

CHIRATIDZO

...kuverengwa kweShoko. Kuitira shumiro yekuvhara, chikonzero ndakukumbirai kuti mumire...Kana vachirida *Star-Spangled Banner*, munomira. Hamudaro here? [Ungano inoti, “Hongu.”—Mupepeti] Saka tingatadza nei kuShoko raMwari? Kuremekedza. Zvino tichivhura muBhuku raEksodho, chitsauko 12, kutanga nendima 12, Ndinoda kuverenga chikamu cheGwaro, ndima 12 ne13.

Nekuti ndichapfuura nemunyika yeEgipita husiku huno, zvino ndicharova...matangwe munyika ye—yeEgipita, zvose munhu nezvipfuwo; uye...ndichaisa mutongo: Ndini JEHOVHA.

Ropa richava chiratidzo kwamuri paimba yamunogara; zvino kana ndichiona ropa, ndichakupfuurai, uye dambudziko harizokuwirai kuti rikuparadzei, kana ndichirova nyika yeEgipita.

² Chidzidzo changu ndeche kuti: *Chiratidzo*.

³ Ngatikotamisei misoro yedu zvino. Uye mukunyarara kwaVo kwenguva ino yakaereswa, tisati tauya kwaVari mumunamato, pane chikumbiro here chaungade kuti Mwari vapindure masikati ano? Ingosimudza maoko ako kana uchidaro, uye wofunga pakadzika mumoyo mako izvo zvaunoda kuti Vaite. Chero kupi muchivakwa, ingofunga zvaunoda kuti Vaite.

⁴ Baba vedu Vekudenga, Ndimi Mwari vasingashanduki, uye tinonamata kuti Mugopindura minamato yedu, masikati ano, pa—patakasmudza maoko edu. Uye Imi munoonaa kuti maoko angu akasimudzwavo, zvakare. Uye chikumbiro changu, ndichachizivisa paruzhinji, kureva kuti, Ishe, kuti Muchapodza munhu wese ari muno nhasi, ponesai wese akarasika. Zvino, Makati, “Kana ukakumbira Baba chero chinhu, muZita raNgu, Ndichachiita.” Zvino, Ishe, tibatsirei pamwe chete kuti titende seboka rimwe revanhu, revana vanotenda. Taurai kubudikidza neShoko reNyu, Ishe. Shoko reNyu iChokwadi. Ropafadzai moyo yedu.

⁵ TinoKutendai nokuda kwemusangano uno. TinoKutendai nokuda kweHama Grant, uye nevashandi vavo vese, uye nemachechi ese nevanhu. Uye nezvese izvo zvaMakatiitira, Ishe, tinoKutendai. Baba, panogona kuve nevazhinji vedu pano vasingazomboonane zvakare zvino, kusvikira tazoona kune rimwe divi. Ino inogona kunge iri shumiro yekupedzisira yatichagara pamwe chete munyika ino. Dai Mweya Mutsvene wauya utiropafadze pamwe chete, ushumire kwatiri zvatinoshuvira. Muzita rajesu tinonamata. Ameni.

Garai henyu pasi.

⁶ Ndine chidimbu chebepa chidiki pano, chandinonyora mamwe Magwaro nezvinhu zvidiki. Zvaisimboitika kuti ndaigona kuzvirangarira mupfungwa dzangu, asi ndichangopfuura makumi maviri nemashanu, munoziva, ndiko kuti, kechipiri. Uye zvakare handicharangariri sezvandaimboita, uye nevazhinji kwazvo vachibatikana mumisangano nezvinhu, nezvimwe zvakawanda kwazvo zvekuita.

⁷ Chidzidzo chedu masikati ano ndecekuti: *Chiratidzo*. Chiitiko chedu chinovhurikira muEgipita. Mufananidzo mukuru pano zvino, ndinoda kuti imi mose muuone uye ingovai nekuremekedza sekwamunokwanisa. Egipita ndiyo nzvimbo yechiitiko, uye nguva yechiitiko inongova pakutanga kweeksodho.

⁸ Uye, zvino, mufananidzo wanhasi, unoratidzwa, sezvatiri kutarisanawo neimwe eksodho. Mwari vachaburitsa Israeri kubva muEgipita, kuenda kunyika yechipikirwa, waive mufananidzo waKristu achiburitsa Mwenga kubva muchechi, kuenda kuNyika yechipikirwa. Tiri mune imwe eksodho. Zvino kana mukanzvera Rugwaro, tinongova nenguva yekurova nhongonya dzaro, ndicho chokwadi. Tiri... SaMwari vakaburitsa rudzi kubva mune rumwe murudzi, Mwari vachaburitsa Mwenga kubva muchechi. Mwenga uchadanwa kubva mumachechi ese. Ndeavo vari vasanangurwa waMwari, vachaburitswa kunze. Zvino isu tave pamuganhu wedanho reeksodho iyoyo zvino, nekuti tine humbowo hwese hweGwaro hwekuti takamira ipapo. Zvino, ndinoziva kuti zvakataurwa kakawanda, asi, shamwari yangu, imwe nguva zvichataurwa kekupedzisira. Nguva ichanyangadikira muna Ziyendanakuenda ipapo. Ari kuuya kuzotora Mwenga kubva muchechi.

⁹ Chiratidzo ndicho chinhu chakaisa mutsauko pakati peEgipita neIsraeri, ndudzi mbiri idzi. Vese vaive vanhu, asi vese vakasikwa naMwari, ese mabasa emaoko aMwari, asi, mutsauko apo mutongo werufu waiswa, mutsauko pakati pehupenyu nerufu waive chiratidzo.

¹⁰ Uye ndizvo zvazvichava pakuuya kweMwanakomana waMwari, paAnoburitsa Mwenga kubva muchechi, mutsauko uchava Chiratidzo. Zvino, nyatsoteererai masikati ano, uye muone kana chisiri chokwadi. Chiratidzo ndicho chichava mutsauko. Panofanira kuva nemutsauko.

¹¹ Mwari vachatonga nyika, nerimwe zuva. Kana ndikabvunza vanhu vechiKatorike kuti, "Vachatonga ani, Vachatonga nyika nei?" Vaizoti, "Chechi." Chechi ipi? "Chechi yeKatorike." Ipi yacho Chechi yeKatorike? Kune dzakati wandei dzayo. MaMethodisti anozoti, "neMethodisti," maBaptisti zvino

vanenge vabuda mairi. Zvino, kana mukaitonga nechechi yeBaptisti, vamwe vese vanosara kunze. MaPentekosti vanoti, “nePentekosti,” zvino vamwe vese vanosara kunze. Munona, zvinenge zviri nyonga-nyonga, nyonga-nyonga yakanyanyisa, zvichinyanyisa kuvhiringidza pfungwa, kufunga nezve chinhu chakadaro.

¹² Asi Mwari vaive nenzira pano yaVachatonga nayo nyika, kwete nechechi yeKatorike, kwete nechechi yechiprotestanti. Asi Vari kuzotonga nyika kuburikidza naJesu Kristu, uye Jesu iShoko, saka ipapo zvinodzoka kuBhaibheri zvakare. Maona? Vachatonga nyika neBhaibheri. Uye Bhaibheri ndiro Bhuku rekutonga raMwari, ranova chizaruro chizere chaJesu Kristu, rokuti hapana chimwe chinhu chinogona kuwedzerwa kana chimwe chinhu chinobviswa paRiri; murango wekuzviita, izita rako richibviswa muBhuku reHupenyu. Chingogara muBhuku chaimo, uye tokumbira Mwari kuti vatiite chikamu chaRo.

¹³ Zvino tinoona kuti, chiratidzo, chiratidzo chii? Chiratidzo mucherechedzo weemutengo wakabhadharwa, ndicho chiratidzo. Sezvakangoita makambani ezvitima zvedu nemakambani emabhazi, tinotora mari yedu toenda kuchiteshi. Zvino, munona, vemabhazi havatenderwe, munzvimbo idzo dzinoshandiswa matikiti, havatenderwe kutora mari. Havagone kutora mari, zvinototora chiratidzo; toti, ndege, chero nezvimevewo. Unoenda kune imwe nzvimbo, pakaunda yekubhadharira, zvino wotenga, nemari yako, matikiti akawanda zvakati, chimwe chiratidzo ichi. Uye chiratidzo ichi mucherechedzo wekuti mari yerwendo rwako yabbadharwa. Une kodzero yekukwira chikepe, kukwira ndege, kukwira bhazi, kana chero zvachiri, chero bedzi wakabata chiratidzo kuratidza kuti rwako—kuti rwendo rwako rwabhadharirwa. Zvino rangarirai izvozvo. Musazvikanganwe.

¹⁴ Gwayana rakauraiwa reIsraeri ndiro raive riri...raive icho chaidiwa naMwari. Jehovha vaida gwayana rakauraiwa, chinotsiva chisina mhosva. Sezvatakafuura nemazviri muvhiki rakapfuura zvino, kuti Mwari, paVanoita sarudzo, HaVambofe vakaishandura. Uye Vakagadzira nzira, chinhu chaVo chekutanga chaVakaita munhu paakawa, Vakatomugadzirira nzira yekudzokera, kana Vakamboda kumudzikanura, uye Vakaita sarudzo yekuti Vakaponesa munhu neRopa reUyo asina mhosva. Uye Vakagara nguva dzose vachiita chinhu chimwe chete. Havana kumbobvira vazvishandura. Hakuna nzvimbo Mwari yaVanoscanga nemunamatii, kunze bedzi kwepasi peRopa. Ndiyo nzvimbo yaVo yoga.

¹⁵ Tinoedza kuVaita kuti vasangane pasi pedzidziso yedu yebhaibheri, pasi pesangano redu, pasi pezvirongwa zvedu zvedzidzo. Vamwe vakavaka masvingo uye vamwe vakavaka maguta, Bhabhironi ne—nerusvingo rweBhabheri, nemhando

dzose dzakasiyana dzezvinhu. Asi zvinoramba zvakadaro, Mwari vanongosangana nemunamati wechokwadi pasi peRopa. HaVambozvishandure. Tese hatigone kuve maMethodisti, tese hatigone kuva maPentekosti, tese hatigone kuva *izvi*, *izvo*, kana *zvimwewo*, hatibvumirane. Asi kana ndikauya kune munhu, angave muprisita weKatorike kana chero zvaari, kana ari pasi peRopa iroro tiri hama, zvisinei nokuti aripi, chero bedzi ari pasi peRopa iroro.

¹⁶ Zvino, gwayana rakauraiwa reIsraeri ndiro raidiwa naJehovah, uye ropa ndiro raive chiratidzo chekuti basa raitwa. Mwari vakada kuitira rudzikinuro, kubva muEgipita, kuenda kunyika yechipikirwa, Vakada mhuka yakauraiwa. Uye mhuka iyoyo inofanira kuva ine...Ropa remhuka yakafa rinofanira kuiswa pachivivo uye nepamusivo, uye zvaimiririra chiratidzo chekuti chinhu chakange chichidiwa naJehovah chazadzikiswa. Maona? Zvino, kwete kuti gwayana ndiro rakanga riri chiratidzo, ropa ndiro raive chiratidzo. Zvino, hupenyu hwakanga hwabuda muchibairo, uye zvino ropa raive chiratidzo. Mirairo yavo yakanga yaitwa. Ropa rakamirira chiratidzo, chiratidzo chekuti mutendi uyu akange anyatsoita chaizvo zvaive zvichidiwa. Ndicho chaive chiratidzo. Zvakanaka, kuona mutendi, achinamata, akazobatanidzwa nechibairo chake. Maona?

¹⁷ *Heino* imba, nemunamati, chii chaidiwa? "Urayai gwayana. Nezuva regumi nemana mushure mekunge ratorwa, mu—mukono usina chipomerwa, Israeri yose ichariuraya, uye ropa richatorwa nehisopi zvino roiswa pachivivo chemusivo."

¹⁸ Uye, gara zviya, hisopi iyoyo yaingova sora rinowanikwa pese-pese. *Hisopi* zvinoreva "kutenda kwako." Mumwe munhu anoedza kuve nekutenda kwepamweya, ndosaka uchipotsa kupodzwa kwako. Kutenda kunongova chinhu chamazuva ese. Une kutenda kwekuuya kuchechi. Une kutenda kwekfamba kunze uko. Une kutenda kwekumutsa mota yako. Une kutenda kwekudya svusvuro yako. Ndozvazviri, kungori kutenda kwamazuva ese. Zvino kuisa ropa, raiiswa nehisopi, inongova masora anowanikwa pese-pese anokura chero pai zvapo muParastina, zvichiratidza kuti kutenda uko ropa rinofanira kuiswa nako hachisi chimwe chinhu chepamusoro-soro chaunofanirwa kuva nemhando dzose dzemadhidgirii ehudhokotera kuti uzviite. Kungori kutendawo zvako, kwemazuva ese, kwekutenda Mwari. Maona? "Isa ropa," nekutenda, "nehisopi."

¹⁹ Zvino, munamati, ipapo, achionekwa pasi peropa irori, zvakataridza kuti akaita zvaidiwa naJehovah, uye akabatanidzwa. Chiratidzo chakaratidza kuti akabatanidzwa pamwe negwayana rakauraiwa iro rakange richidiwa naJehovah. Basa raive raitwa. Mufananidzo wakakwana sei nhasi, waKristu nemutendi. Kana Chiratidzo charatidzwa

kumutendi, zvino Chinoratidza kuti chakagamuchirwa uye basa rakaitwa.

²⁰ Zvino, ropa raive chiratidzo chekuzvibatanidza, ropa pacharo. Mhuka yakabuda ropa, ikafa, uye ropa rayo rakanga riri pamadziro. Zvino, hupenyu hwemhuka, hwaive muropa. Uye hupenyu huri muropa, tinoviziva izvozvo. Bhaibheri rakadaro, uye sainzi inozviratidza, hupenyu huri muropa. Saka naizvozvo kana mhuka yauraiwa, uye hupenyu wagurwa kubva mumhuka, ropa raifanira kuva zvinoumba ropa, kuti rimiririre chiratidzo. Nekuti, hupenyu hwaive muropa hwakanga husingakwanise kudzoka pamutendi, nekuti hwaiva hupenyu hwemhuka.

²¹ Uye hupenyu hwemhuka nehupenyu hwemunhu zvakasiyana zvachose. Hamuna, kana zviri mariri zvachose. Wakatora, ukatora ropa remhuka woriisa mauri, unoфа. Saka munooна, isu, humwe—humwe hupenyu hwakasiyana huri muropa remhuka pane huripo muropa remunhu, nekuti munhu ane munhu wemukati. Mhuka haina munhu wemukati.

²² Uye zvino, nokudaro, ropa pacharo, nzwisisai zvino, zvinogadzira zvitsvuku, zvinogadzira ropa, zvaifanira kumira pachena pamusuwo, sechiratidzo chekuti gwayana rakanga rafa, zvino, nekuti hupenyu hwegwayana hawaigona kudzoka pamunhu munamati. Asi nhasi...Waingova bedzi mufananidzo.

²³ Nhasi harisi iro Ropa chairo raIshe Jesu, Gwayana redu, asi Hupenyu hwaive muRopa, hunova Mweya Mutsvene. Hunodzoka uye ndicho Chiratidzo chekuti takagamuchira uye takaita chaizvo zvatakaudzwa naMwari kuti tiite. Uye zvakare, nekuva neChiratidzo, tinobatanidzwa neChibairo chedu. Zvakakwana. Handione chero chimwezve chinhu chingajeka zvinopfuura apa. Maona?

²⁴ Nzira yega chero munhu anogona kuziva kuti imba iyoyo yaivewo, zvakare, pasi peropa, nekuti ropa pacharo raive pamikova. Vakapfuura, Mutumwa werufu aifanira kutarisa uye oona ropa. Zvino, zvakare, waive mufananidzo weMweya Mutsvene.

²⁵ Zvino, maona, Ropa chairo raJesu haraikwanisa kuuya pane mumwe nemumwe wedu, nekuti Aingova neropa rakakwanira mumuviri wake. Zvino rakadonha, richibuda mumuviri waKe, richipinda muvhу, makore zviuru zviviri zvapfuura; asi rakanga risiri kuzova seChiratidzo. Hupenyu, Hupenyu hwaive muRopa, hwaive Chiratidzo zvino. Ndichazviratidza kwamuri, muminiti imwe chete, neBhaibheri. Ndicho Chiratidzo chinouya pane mumwe nemumwe wedu, kuratidza kuti takabatanidzwa neChibairo chedu, uye takaita zvinodiwa naJehovah.

²⁶ Petro akati, neZuva rePentekosti, "Tendeukai, mumwe nemumwe wenyu, uye mubhabhatidzwe muZita rajesu Kristu kuti muregererwe zvivi, uye muchagamuchira chipo cheMweya

Mutsvene. Nokuti vimbiso iyi ndeyenyu, nekuvana venyu, uye nekune avo vari kure, avo vachadanwa naIshe Mwari wedu.” Munoona, kwete kungochiratidza kwavari bedzi. “Avo vose vachadanwa naIshe.”

²⁷ Kune vazhinji vanofunga kuti vakadanwa. Asi vese “Ishe” vavanodana! “Avo vaVakafanoziva, Vakavadana; vese vaVakadana, Vakavaruramisa; vese vaVakaruramisa, Vakavabwinyisa,” nechekare chinhu chacho chakatogadziriswa.

²⁸ Zvinoka kana ukatora munhu asingatendi kuti Mweya Mutsvene ndewe zuva rino, munoona here zvavari kuita? Vari kuramba Chiratidzo chinova mucherechedzo chaiwo wako wekubatanidzwa neChibairo chako. Munoona here zvandiri kureva? Zviri nyore kwazvo kana ukangozvitarisa ne—nenzira iyo Mwari vakazvinyora nayo zvino. Ropa rakatitakura uye isu taive... rinoratidza mu—mucherechedzo weMweya Mutsvene, hunova Hupenu.

²⁹ Zvino, hupenu hwemhuka hawaikwanisa kudzoka mumunhu, nekuti hauenderane, hupenu hwemhuka hauna munhu wemukati mahuri. Hupenu hwemunhu hune munhu wemukati. Mhuka haizive kuti yakashama. Haizivi chakanaka nechakaipa. Iyo, inongo... Ine mwe—mweya, asi kwete munhu wemukati. Zvino rangarirai, zvino, munhu wemukati ndiyi hunhu hwemweya, ndizvo.

³⁰ Zvino tarisai, asi ipapo Hupenu hweChibairo chedu, Jesu Kristu, Ropa raKe parakadeurwa... Aive Mwari, vaive vari muMunhu mumwe chete. Zvino, Akadzika zasi achibva pakuva Jehovha, kuti azviratidze semunhu, kuti azvitore paAri chimiro chemunhu, kuti atibatanidze naYe. Aive Gwayana raMwari. Uye nechomukati maKe, umo Ropa...

³¹ Zvino ndinoziva kuti mumwe munhu anoti, “Akanga ari ropa remuJudha.” Munonzwa maJudha vachidaro. Akange asiri ropa remuJudha, uyezve Aive asiri Ropa reMarudzi. Aiva Ropa raMwari. Aive asina kana remuJudha... Akanga asiri muJudha kana Murudzi. Aive Mwari. “Mha—mha—mhandara ichava nemimba.”

³² Zvino, ndinoziva vazhinji venyu imi vanhu uye nemaProtestanti munofunga kuti zai raiva raMaria. Uye chichizenga cheropa chinouya, hupenu hunouya huri muchizenga cheropa. Nekuti, huku inokwanisa kukandira zai, pasina kuti yaiva nejongwe, harichechenye, nekuti harina hupenu. Hupenu hunobva muropa, rinobva mumunhurume. Asi apa pakange pasina munhurume, saka, “hupenu huri muropa,” hwaifanira kubva kuna Mwari yoga, uye Vakasika chizenga cheRopa mumimba yaMaria. Mwari pachaVo, Musiki pachaVo, vakasika Chizenga cheropa. Zvino tarisai. Vanoti, “Handiti, waive mutumbi. Maria aive nezai.” Kwete, changamire. Akanga asiri; pasina zai. Kana dai raive zai, haugone kuwana mbeu

pasina kakutekenyedzwa. Uye kana Iye, mudzimai aive nekakutekenyedzwa, munozoita kuti Mwari vange vachiitei?

³³ Vakasika zvese zai neRopa. Ndizvo chaizvo zvaAive. “Takabata Mwari,” Bhaibheri rakadaro. Timotio Wokutanga 3:16, “Pasina gakava chikuru chakavanzika chehumwari: Mwari vakaratidzwa munyama. TakaVabata nemaoko edu.” Mutumbi iwoyo waive Mwari. Zvirokwazvo, wakanga uri. Aive Mwari pose hapo, ari muchimiro chemunhu wenyama.

³⁴ Zvino tinocherechedza mune izvi, kuti chizenga ichocho cheRopa chichipamurwa, chakaburitsa Mwari. “Mwari vaive muna Kristu, vachizviyananisira nyika kwaVari.” Uko, kwaive kusina mumwe munhu aigona kuzviita, hapana chimwe chinhu chaigona kuitwa; zvakatotora Ropa dzvene iroro, pachaKe. Mwari vakatozoburuka pasi ndokuzova munhu, kuti vatambudzike nemurairo waVo pachaVo. Kana dai Jesu aingova muprofita, munhu akapatsanurwa kubva kuna Mwari, saka Mwari havana nduramo.

³⁵ Dai ndaigona kuti, “Regai Hama Grant vafire chimwe chivi icho Billy anofanira kufira,” kana chimwewo chinhu, mumwe murango, zvaizova zvisina nduramo. Dai ndaive nemukomana wangu pachangu kuti afire murango wandakange ndataura, zvakadaro hazvina nduramo. Pane kuita kumwe chete kune nduramo kwandingakwanise kuita, ndiko kutora nzvimbo yake, kana ndiri kuda kumuponesa.

³⁶ Uye Mwari vakatozova nyama, kuti vatore nzvimbo yemutadzi; Mwari vakaratidzwa munyama, vasiri chimwe chinhu kunze kwaMwari pachaVo. Zvino, hepano paAive, achiratidzwa munyama, kuti abvise zvivi zvenyika. Uye Iye akazviratidza pachaKe matiri, kuitira kuti isu tigoratidzwa maAri. Munoona chinangwa chacho?

³⁷ Zvino tinoona kubatanidzwa kwedu neChipiriso chedu, Hupenyu hweChipiriso huri matiri, hunova Mweya Mutsvene. Chizenga ichocho pachakapamurwa, chakaburitsa Mwari, chakaburitsa Mwari, kuti Akange achenesa vanhu neRopa raKe pachaKe ndokuisa Mwari mumunhu zvakare. Mwari mauri, Hupenyu Husingaperi!

³⁸ Uye chero mudzidzi wechiGiriki anoziva kuti izwi iroro, Hupenyu Husingaperi, rino bva pashoko Z-o-e, Zoe, zvinoreva “Hupenyu hwaMwari pachaVo.” Ndizvozvo. Nzira chete yaungagone kuve neHupenyu, pane mhando imwe chete yeHupenyu Husingaperi, zvino ndihwo Hupenyu hwaMwari pachaVo mauri. Maona? Zvadaro wava neHupenyu Husingaperi, nekuti Ndivo vega Vokusingaperi varipo. Uye isu tiri zvizengwa zvepfungwa dzaVo, pasati patombova nenheyo dzenyika kana chero chinhu. Zvese izvi kungori kufunga kwaVo, uye isu tiri kuratidzwa kwepfungwa dzaVo zvadzaive dziri.

³⁹ Zvino Vaitofanira kudzika zasi kuti vabvise chivi. Hapana mumwe munhu aigona kuzviita. Pakanga pasina munhu akakodzera kuzviita. Hapana aigona kuzviita kunze kwaVo, uye Vakazviita.

⁴⁰ Uye zvakare, apo Hupenyu ihwohwo pahwakabuditswa kubva mumutumbi iwoyo, Munhu, aive Mwanakomana waMwari (simba raVo rekusika rakagadzira chivakwa, semumwe muvaki wese, ndokuvaka chivakwa chaVakapinda machiri, pachaVo, Mwari vakazviita.), Uye zvadaro hupenyu ihwohwo pahwakatorwa, Ropa, zvigadziriso zvaRo, zvakadururirwa pasi, sezvakangoita raAbheri *wakarurama* rakadururirwa pasi, asi kubva muRopa iroro kwakauya Mweya Mutsvene waMwari, uye wakatumirwa kumunhu neZuva rePentekosti, kuzobatanidzwa neChibayiro chakavafira. Hapana imwe nzira pasi pano yatingachiwana nayo. Chiratidzo chemazvirokzwavo!

⁴¹ Tarisa, kana waiva nemhosva yerufu, uye uchiziva kuti uri kuenda kuchigaro chemagetsi, zvino rangarira, kuramba...

⁴² Dallas, teerera! Kuramba Ropa raJesu Kristu, Chiratidzo cheRopa raKe, kana ukaRiona zvino woRiramba, uchatarisana neKutongwa uine Ropa raKe riri pamaoko ako. Mutadzi, nhengo yechechi, rangarira izvozvo.

⁴³ Ko dai Lee Oswald aigona, iwo mazuva mashoma, uye kudikitira kuya pamberi peDare Repamusoro-soro remhosva raaifanira kutarisana naro; uye achiziva, pakuuraya Mutungamiriri wenyika, hapaizove kana nechidodzi chimwe chetsitsi, murume iyeye anofanira kunge akanzwa sei! Chinofanira kunge chaive chinhu chinotyisa kwazvo. Haana kuzombosangana nazvo, nekuti mumwe muchinda akamupfura. Asi imbofunga wakagara ipapo pamberi peDare Repamusoro-soro remhosva rakatsamwa, uine ropa reimwe hama yako paruoko rwako, Mutungamiriri weUnited States! Ichchoch chichava chinhu chakareruka, kunemi vanhu vanopfuura nepaRopa raJesu Kristu, pamuchamira pamatare emhosva aMwari. Uchidikitira pauchaziva. Oswald hapana chimwe chaaikwanisa kuita kunze kwekumubvisira hupenyu hwake, asi Mwari vanokubvisa zvemuna Ziandanakuenda kubva muHupo hwaVo. Chichava chinhu chinotyisa kwazvo. Cherechedzai.

⁴⁴ Kana waizofanira kuuya kumatare edzimhosva, uine mhosva, waizotsvaga gweta rinogonesesa raungawana. Chero ani zvake aigona kuzviita.

⁴⁵ Uye munhu wese anozvarwa munyika, handina basa nekuti kumba kwaanobva kwakanaka zvakadii, ane mhosva yeRopa raJesu Kristu kusvikira agamuchira kuregerera kwaro. Uye nzira chete yaunoziva nayo kuti kuregererwa kwakarurama, ndeapo Chiratidzo pachinoZviisa pauri, uye wova neChiratidzo.

⁴⁶ Cherechedzai, uine mhosva, zvino unotsvaga gweta rakanakisa raungagona kuwana kuti rimiririre nyaya yako. Uye kana ndanga ndiri kuenda paKutonga kwaMwari, handidi kana muprisita, handidi kana munhu; Ndinoda gweta rinogonesesa randingawane kuti rimiririre nyaya yangu.

⁴⁷ Rega nditaure kune izvi, kwamuri, shamwari yangu Mukristu. Gweta redu ndiro zvakare mutongi wedu, uye mutongi wedu—wedu akava gweta redu. Nyaya yacho yatopera patinogamuchira ruregerero rwaKe. Mutongi pachaKe akauya pasi ndokuva gweta, uye gweta nemutongi Munhu mumwe chete. Mwari vakava munhu, kuti Varuramise munhu nerufu rwaVo pachaVo rwaVakaisa paari. Hareruya! Zvinoreva kuti, “Rumbidzai Mwari wedu!” Akakodzera kuwana rumbidzo dzese. Mutongi wedu negweta redu ndiye Munhu mumwe chete.

⁴⁸ Mweya Mutsvene ndiwo Chiratidzo chekuti takaregererwa. Nyaya yacho yapera. Kune murume nemukadzi wese akagamuchira zvechokwadi rubhabhatidzo rweMweya Mutsvene, akatongwa, anobatanidzwa negweta rake, nemutongi wake, nechibairo chake, uye Chiratidzo chaainacho chaakabata chinoratidza kuti rwendo rwake rwakabhadharwa kuenda muKubwinya. Ameni. Zvatopera. Akabata Chiratidzo ichocco. Ndechake, rubhabhatidzo rweMweya Mutsvene, rwunova chapupu cherumuko rwaJesu. Ameni. Munozvitenda here? [Ungano inoti, “Ameni.”—Mupepeti] Ndiko kubatanidzwa kwako, wakabata Chiratidzo.

⁴⁹ Zvino kana usina Chiratidzo ichocco, hausi kuzopinda. Unofanira kuva neChiratidzo. Ndiwo mutengo unodikanwa, “Pandinoona ropa, ropa ndiro chiratidzo. Pandinoona ropa, ndichakupfuura.” Unofanira kuva neChiratidzo. Kana usina, handiti, hauende. Unofanira kuva neChiratidzo.

⁵⁰ Kana chiratidzo chisina kuiswa pachena, chiratidzo chisina kuratidzwa zasi uko, kunyangwe sungano yakange isingashande. Unoti, “Saka, zvino, Hama Branham, zvino chimbomirai zvishoma.” Ndizvozvo chaizvo.

⁵¹ Chiratidzo chaise pamusoro pesungano. Nekuti Israeri yaive nesungano yekudzingiswa, uye chero muJudha aigona kuenda kunze kunoratidza chero munhu, “Ndinogona kukuratidza kuti ndakadzingiswa, ndiri muJudha, ndakadzingiswa maererano nekuraira kwajehovha,” asi zvakadaro hazvina kumupa pembedzo kana chiratidzo chaise chisipowo zvakare. Anofanira kuisa chiratidzo pachena. Muri kuzvibata here? [Ungano inoti, “Ameni.”—Mupepeti] Iye... Chiratidzo chinofanira kunge chiripo, zvakadaro. Uye kana uri musungano... Kana chero muJudha akati, “Handisi kuisa ropa pasuwo rangu, Ndinogona kuratidza kuti ndiri muJudha wesungano,” Mutumwa werufu akamutora. Hazvina mhosva kuti aive akavimbika zvakadii, aive nhengo yechechi yakadii, akabhadhara chegumi chakawanda

zvakadini, kuti akataura kuti anotenda Jehovha zvakadii; Jehovha vaida chiratidzo ichocho.

⁵² Uye Vanozviita nhasi, zvakare. Zvinofanira kuva zvakadaro. Zvinotofanira kuva zvakadaro, “Nekuti hapana imwe nzira pasi peDenga, hapana rimwe zita rakapihwa, nechero nzira,” zvisinei nekuti wakanaka sei, wakatendeka zvakadii. Chiratidzo ichocho chinofanira kunge chiripo ipapo, uye chichiratidza pachena.

⁵³ “Ropa,” unoti, “saka, ndauraya gwayana uye ndikariisa muchirongo. Ndarigadzika kumashure kuno.” Handizvo zvaAkataura. Rinofanira kunge iri pachivivo uye nepanzvimbo yemusuwo. Rinofanira kuratidza pachena.

⁵⁴ Uye hupenuy hwako hunofanira kuratidza pachena Chiratidzo chiru mauri. Oo, imi maPentekosti, dambudzikorenyu nderei? Vhudzi rakagerwa, zviso zvakapendwa, varume, nyambo dzakasviba nezvime, kuripiko kuratidza pachena kweRopa raIshe wangu Jesu Kristu ndiro Chiratidzo cheMweya Mutsvene? Imi, mune chimiro chehumwari, uye muchidana kuti “huroyi” nezvime, mabasa aMwari, “huroyi.” Munoratidza sei chiratidzo?

⁵⁵ Vanoti, “Ndiri muPente-...” Handina basa nezvauri. “Ndiri muBaptisti. Ndiri muPres-...” Handina basa nezvauri. Chiratidzo ichocho chinofanira kunge chiripo ipapo. Mwari vanoChida, uye kwete chimwe chinhu asi ichocho.

⁵⁶ Unoti, “Saka, ndine rehudhokotera.” Handina basa nemadhigirii awakawana. Mwari vanoda Chiratidzo ichocho, uye Ichchocho chete. Ndicho chiratidzo chekuti nzira yako yakabhadharwa. HaVasi kuzotora magwaro ako kana chimwewo chinhu. Anofanira kuva neChiratidzo ichocho.

⁵⁷ Mutyairi webhazi anoti, “Nhai, mira zvishoma, harisi tikiti rangu.”

⁵⁸ Murume wendege anoti, “Saka, iwe enda kunze uko zvino.” Tikiti chiratidzo. Enda kunze uko wonoudza mutyairi wendege, “Nhai, ndinoda kukwira mundege yako. Imarii?”

“Pinda umo unotora tikiti rako.”

“Oo, ndichakubhadhara.”

⁵⁹ “Handikwanise kuitora. Hauzokwira mundege yangu kusvikira waenda kunobhadhara mutengo nekuwana tikiti. Ndiri kutsvaga tikiti.”

Unoti, “Zvakanaka, ndakaenda kuchikoro. Ndakaita *izvi*. Ini...”

⁶⁰ Handina basa nezvawakaita, unofanirwa kuve neChiratidzo kana kuti haukwire. Ameni naameni. Hamukwanisi kuzviona here? Mwari vanoda Chiratidzo ichocho. “PaNdinoona ropa, uye roga Ndichakupfuura paNdinoona chiratidzo.”

⁶¹ Risina kuratidzwa pachena, sungano yakanga isingatomboshandi. MuJudha aigona kunyatsotaura nekuzviratidza pachake kuva—kuva muJudha akadzingiswa, aigona kutora hama kunze onoti, “Tarisai pano, ndakadzingiswa.” Hazvina kana chinhu chimwe chete chazvaireva.

⁶² Unoti, “Ndiri muMethodisti. Ndiri muBaptisti. Ndiri muPentekosti. Ndiri *izvi*. Ndiri *izvo*.” Hazvina kana chinhu chimwe chete chazvinoreva.

⁶³ Unofanira kuva neChiratidzo. Zvino kana Chiratidzo chauya, Chinopupura nezvaKristu. Akati Chaizodaro. Zvino Kristu ndiye Shoko. Uye ungaramba sei kuti Bhaibheri ndere chokwadi, chikamu chaRo, zvino woramba uchiti une Chiratidzo, apo Chiratidzo ndicho huchapupu hwaJesu Kristu? Munoona, ipapo ndipo pandinoshamisika.

⁶⁴ “Oo,” woti, “Handitendi, ndinotenda kuti mazuva echishamiso...” Oo, ngwarira, hapana Chiratidzo ipapo. Chiratidzo chinobvumirana neShoko rega-rega ne “ameni,” zvinhu zvese, nekuti ndiMwari pachezvaCho. Maona? Zvakanaka.

⁶⁵ Asi kana chiratidzo chaise chisipo, sungano yaive isingashandi. Yaishaiswa basa. Zvimwe chete zvino! Zvisinei nekuti—nekuti unotaura zvakadii, ungataure zvakadii uchiti, “Ndinotenda Shoko rose riri muBhaibheri,” woti, “Hama Branham, ndi—ndinogona kukutaurirai hafu yeBhaibheri iro, Bhaibheri rose, nemusoro. Ndinotenda rese zvaRo.” Izvozvo zvakanaka. Satani anodarowo, zvakare. Uh-huh. Zvinotora Chiratidzo!

⁶⁶ “Zvakanaka, Hama Branham, ndine madziro angu azere nemadhigirii. Ndine Bachelor of Art, uye ini ndine dhigirii rachiremba, neLLD. yechiTariyana. Uye, oo, ndakanyora mabhuku. Ndakaita *izvi*. Ndakaita zvese. Ndaka—ndakaita zvinhu zvese *izvi*.” Handina basa nazvo. Izvozvo zvose zvakanaka, asi zvakadaro unofanira kuva neChiratidzo. Chiratidzo, kunyangwe zvakadaro Chiratidzo chinodiwa!

⁶⁷ Unoti, “Ndiri mudzidzi weBhaibheri. Ndiri—ndiri munhu akanaka. Ndiri *izvi*, *izvo*.” Zvinogona kunge zvakanaka, zvese zvakanaka, asi zvakadaro zvinofanirwa kuve neChiratidzo!

⁶⁸ Zvino, rufu rwakanga rwagadzirira kurova Egipita chero nguva, naizvozvovo rufu rwakagadzirira kurova nyika chero nguva.

⁶⁹ Anna Jeanne, ndinonzwa chimwe chinhu sababa vako, vakataura chimwe chirevo imwe nguva. Ndakagara ndichizvifarira izvozvo. Vakati, “Munoziva, nyika ino, ine zvivi zvimwe chete, kana Mwari vakarega America ichishaya murango unoiwana nokuda kwezvairi kuita, Vachasungirwa

pamaruramiro chaiwo kumutsa Sodhoma neGomora vokumbira ruregerero kwavari, nekuvapisa." Uye ndizvozvo chaizvo.

⁷⁰ Rangarirai, Israeri yakabhadharira chivi chese chayakaita, nesuwo tichadarowo. Tiri kuregedzeka zvakadii? Simbisai nhumbi dzokurwa nadzo! Dzokai kuna Mwari, chechi! Kwete kutaura zvinhu izvi kuti ndive ndakasiyana. Ndiri kukutaurirai seyambiro. Imi tendai!

⁷¹ Rufu rwakagadzirira kurova. Mwari vaive vavaratidza nyasha dzaVo netsitsi dzaVo, kubudikidza nemasimba nezviratidzo nezvishamiso (saka ndizvo zvaVaita nhasi vasati vaburitsa Chechi), zvakadaro havana kushuvira kutendeuka nekutenda mharidzo.

⁷² Munoona, pakanga paine mharidzo nguva pfupi chechi isati yabuda. Zvinofanira nguva dzose kugara zvakadaro. Zvimwe chete zvino. Chiitiko chese chepamweya chiratidzo kubva kuna Mwari. Munozvitenda izvozvo here? [Ungano inoti, "Ameni."—Mupepeti] SeMharidzo, pane chiratidzo uye zvakare Mharidzo inotevera chiratidzo. Mwari vakaudza Mosesi, vakati, "Kana vakasatenda izwi rechiratidzo chekutanga, pamwe vachatenda izwi rechiratidzo chechipiri."

⁷³ Zvino, kana mukaona zviratidzo zvichiitika, uye pasina mharidzo shure kwacho, chichingova chikoro chekare chedzidzo yebhaibheri chimwe chetecho uye zvichidzika, zvaisabva kuna Mwari. Asi panoratidzwa chiratidzo, Mharidzo inochitevera. Zvino tarisai. Jesu akauya panzvimb...

⁷⁴ Ndiri kukudzivirai nzeve here? Kana chero uyo ari pane maikirofoni ino pano, zvinoita sekunge iri kudzoka. Pamwe ine ruzha zvishoma. Ndinoda kuti muibate.

⁷⁵ Jesu paakauya panzvimbo, haAna kubvira ataura zvakawanda kuvanhu, munhu wese aiMuda muchechi yake. "Oo, Muporofita mudiki uyu, isu tinongofara kwazvo kuva naYe." Akange achipodza vanorwara. "Oo, Mwari ngavakudzwe. Mwari vasimudza Munhu mukuru pakati pedu." Zvaive zvakanaka. Saka rimwe zuva zvakasvika pane imwe nzvimbo apo... Ndicho chaiva chiratidzo chaKe.

⁷⁶ Isaya 35 yakati chichave chiratidzo. "Vakaremara vaizokwakuka senondo," nezvimwe zvakadaro, "mapofu aizoona." Chaive chiratidzo.

⁷⁷ Akaratidza chiratidzo chaKe saMesiya, nezvimwe zvakadaro. Uye ivo, vazhinji vavo, vakati, "Hongu, ndaigona kuendera izvozvo." Zvakanaka, zvino, kana chaive chiratidzo, panofanira kuva neizwi rechiratidzo ichocco. Ko nderipi raive izwi kumashure kwacho? PaAkatanga kudzidzisa dzidziso yaKe nekuvadaidza kuti boka renyoka muhuswa. Akange achisina mukurumbira kubva ipapo zvichienda mberi, munonna, apo izwi rakauya nechiratidzo. Chiratidzo chakaenda kutanga.

⁷⁸ Mosesi akadzika zasi kuEgipita nechiratidzo. Uye akakandira pasi tsvimbo yake, ikashanduka kuva nyoka. Ndicho chaise chiratidzo. Asi mushure mechinguva, izwi rakauya nechiratidzo. Ipapo zvaive zvasiyana. Munoona, havadi izvozvo. I—izwi, rinofanira kunge, richitevera chiratidzo. Uye hapana imwe nguva yazvaigona kunge zvakambouya asi nguva iyoyo, nekuti yaive nguva yekuti Magwaro azadzikiswe. Tarisai zvaVakamuudza, mugwenzi raipfuta, “Ndaona kugomera uye ndokukunzwu kwevanhu vaNgu, nekuona kutambura kwavo nekuda kwevarairi vemabasa veEgipita, uye Ndinorangarira vimbiso yaNgu yaNdakaitira Abrahama.” Makore mazana mana akange apera, uye Vakaudza Abrahama kuti vaizove zasi ikoko. Munoona, hapana imwe nguva yazvaigona kuve. Mosesi aitofanirwa kuuya panguva iyoyo chaiyo.

⁷⁹ Chiringazuva chikuru chaMwari chinofamba zvakakwana. Hachizoenda mberi neminiti imwe kana kusaririra neminiti imwe. Chichange chiri panguva yacho chaiyo. Zvakanaka, saka, munoono, zvinhu zvese zvaifamba nemo-nemo chaimo, hazvaisagona kuuya mune dzimwe nguva.

⁸⁰ Kana zvinhu izvi hazvaigona kuuya pane dzimwe nguva. Izvi hazvaigona kunge zvakauya mumazuva aLuther. Hazvaigona kunge zvakauya mumazuva aWesley. Mazuva emaBaptisti kana maMethodisti, mumazuva avo, hazvaigona kuuya. Zvinofanirwa kuuya iko zvino. Israeri inofanira kuva rudzi. Machechi anofanira kuva sezvaari zvino. Paifanira kuva nemharidzo yechitatu, zera rechechi yechitatu. Paifanira kuva neRaodhikia. Hayaiwanisa kuvepo kusvikira Pentekosti yauya ikaita chikamu chayo, ikabuda ndokunoita sangano, uye ikaita zvayakaita. Zvino inofanira kuuya, Ishe vobva vauya, pavanoVaburitsa muchechi. Ndivo Shoko.

⁸¹ Vanota kupikisana neShoko iroro chero kupi hako. Vanoramba vakanyarara samare pamusoro paRo, asi zvakadaro vanoita nharo pamusoro paro.

⁸² Chicago, kuno kasiri kare, apo Ishe vakandipa chiratidzo. Ndakanga ndiine vashumiri mazana matatu zasi ikoko. Ndakati, “Zvino ndinoziva zvamuri . . .” nezve mbeu yenyoka, nezvime zvakadaro, ndakati, “mumwe wenu tora Bhaibheri rako uuye kuzomira kurutivi rwangu uratidze kuti handizvo.” Boka rakanyararisa rawakambonzwa. Ndikati, “Saka ibvai shure kwangu.” Munoona, zviri kubva mune mafungiro avo.

⁸³ Asi zvakadaro, vanoti, “Hama Branham muporofita kana vakazodzwa, asi kana chizoro chabva pavari, oo, handizive.” Ndiwo . . . Kana usiri mucherechedzo wemu—mu—mu—mudzidzi webhaibheri akavhiringika! Izvo chaizvo . . .

⁸⁴ Izwi rekuti *muporofita* rinoreva “muzaruri weShoko waMwari.” Shoko rajehovha rinouya kuvaporofita. Ndiwo mazivirwo akaitwa Jesu. Uye vakati mushure merumuko, vakati,

“Tinoziva kuti Aive muporofita waMwari,” munona, “hakuna munhu angagona kuita zvinhu izvi kunze kwekunge Mwari vainaye,” zvino vobva varega kugamuchira mharidzo yaKe. Vaisagamuchira Johane, uye aive muporofita. Vaisagamuchira Eria, hapana mumwe wavo, uye vaive nechizaruro chaMwari.

⁸⁵ Izwi, izwi reChirungu, *muporofita*, mazwi echiChirungu anogona kureva chero chinhu, rimoreva kuti “muparidzi.” Asi kana ukati *muporofita*, weBhaibheri rakare, zvaireva “muoni.” Uye zvaimuzivisa zvaive, zvekuti, zvaanotaura zvaiitika, uye ndicho chaise chiratidzo chekuti aive muporofita; naiyewo ichocho chaise chiratidzo chekuti aive nechizaruro chaMwari cheShoko rakanyorwa. Uye zvakare Mwari vachizvisimbisa, shure kwake, vakazviratidza.

⁸⁶ Sei? Saka, zvinongofanirwa kuva nenzira iyi, ndizvo zvoga. Hapana nzira yekuzvinyenyeredza. Mwari vakati zvaizove saizvozvo, uye hezvoka izvo. Asi hezvoka izvo nhasi, munona, Chiratidzo ichocho chinofanira kuvapo, chinoratidza Shoko iroro nekuriita kuti rive chaizvo rechokwadi. Zvino kuti Akavimbisa sei, kuti Akagadzirira sei vanhu vake vese venyika yechipikirwa, zvino, paVaizove neeksodho iyi, yaive mufananidzo.

⁸⁷ Zvino ndichaedza kubuda mune angaite mamwe maminitsi gumi nemashanu, makumi maviri, neMharidzo. Nyatsocherechedzai zvino, ndinoda kuti mubate izvi, nokuti ndinogona kusazokuonai zvakare, munona.

Cherechedzai, zvino tarisai kugadzirira kwaVakaita vanhu vaVo.

⁸⁸ Vangani vanoziva kuti haVashandure nzira dzaVo? HaVambozviita. [Ungano inoti, “Ameni.”—Mupepeti] Ndiye... zvino tarisai nemuBhaibheri muone kana Vakamboishandura. Kwete, changamire.

⁸⁹ Vakagadzirira sei vanhu? Kutanga, Vakatumira muporofita nechiratidzo, uyo aive Mosesi. Ndizvozvo here? [Ungano inoti, “Ameni.”—Mupepeti] Uye chiratidzo chaise nemharidzo, mharidzo yeku “gadzirira,” vakanga vachibuda kuenda kunyika yakanga yakavimbisa. Zvino Vakanga vase chaizivisa, chemuporofita uyu, chekuti Chiedza chaise pamusoro pake. Shongwe yeMoto yaitevera muporofita uyu, tinoziva izvozvo, ikapfuura nemurenje naMosesi. Tinozvicherechedza izvozvo. Zvino ipapo Vakavapa chiratidzo chegutsikano yekuti havaifanira kutya, kutsamwa nekuhuta-huta; apo paVakati, “PaNdinoona chiratidzo ichocho, Ndichakupfuurai.”

⁹⁰ Tarisai kuti Vakazviita sei zvino. Vakatanga vagadzirira chiratidzo, mutumwa, mharidzo yakaratidzwa, zvinozivisa mutumwa, uye nechiratidzo chinopa gutsikano yekuti nzira yakabhadharwa. Vakananga kunyika yechipikirwa.

⁹¹ Zvimwe chete zvaVakaita muzuva ranhasi! Chii chaVakaita? Vakatitumira Mweya Mutsvene. Mweya Mutsvene ndiwo Mutumwa, uye chinovazivisa pachaVo cheGwaro chinoVazivisa pakati pedu, mumwe chete zuro, nhasi, nekusingaperi. Uye Chiratidzo ndicho gutsikano. Ko chii chatiri kutya? Mubhadharo wedu wakatobhadharwa kare uye tinobatanidzwa neChipiriso chedu. HaVagoni kukuramba. Vakavimbisa kudaro. Tinobatanidzwa.

⁹² Israeri ichibuda muEgipita, sezvandataura, yakafanana nemwe—Mwenga uchibuda muchechi. Moses paakatanga shumiro yake, Israeri yese yakaungana pamwe chete muGosheni, kunonyengetera nekunamata, chaizvoizvo, ndokubva kumatunhu ese eEgipita. Ndiyo nzira iyo Mwenga uchazviita, uchabuda kubva mune ese maOneness, Twoness, Threeness, nedzimwe mhando dzese. Uchabuda. Unotofanira kudaro. Zvino tinoverenga pano muna VaHebheru ...Isu zvino, chinhu chekutanga chatinofanira kufunga nezvacho, tinobva kumativi ese, “Budai kubva pakati pekusatenda.” Zvino Mweya Mutsvene wakavimbisa kudana izvozvo mumazuva ekupedzisira, “Budai kubva pakati pevasingatendi.” Cherechedzai.

⁹³ Tinoona muna VaHebheru 10:26, yandakanyora zasi apa, inoti izvo, “Kana tikatadza nemaune mushure mekunge tagamuchira ruzivo rweChokwadi, hakuchinazve chibairo chezvivi,” munoonaa, kana ukasatenda nemaune.

⁹⁴ Zvino kana mukacherechedza, ndingati chii pano, kana mungandipawo chinguvana kusvikira ndapa muenzaniso iwoyo. Ndanga ndichinzwa muMweya, hazvina kujeka zvakanaka. Maona? Cherechedzai.

⁹⁵ Hevano vaHebheru, vari munzira yavo yekubuda. Mwari vakasarudza varume gumi nevaviri, kana kuti Mosesi akadaro, neruoko rwaMwari, kuti vaende mhiri kunotsora nyika; uye vakadzoka, ndokudzoka vaine chiratidzo chenyika. Zvino pavakasvika ikoko, gumi vavo vakatyva sevachafa. “Nhai,” vakati, “ivo vaAmareki kumusoro uko, tinoratidzika semhashu kwavari.” Joshua naKarebi vakadzoka, vachiuya nehumbowo, “Tinokwanisa kuzviita!”

⁹⁶ Munoonaa, ndivo vatendi vepamuganhu. Vakauya vachipfuura nezvinhu izvi zvakasiyana, uye vachipfuura nemuchechi, nekujoina chechi, uye nemurubhabhatidzo nezvimiyo. Asi pazvinosvika chaipo pakuyambukira mhiri kunotora Chiratidzo, humbowo hwekuti Nyika iriko, Hupenyu ihwohwo...Jesu Kristu haana kufa. Ndechimwe chiero. Anogara machiri. Anesu, Ari matiri zvino. Kana zvasvika pane izvozvo, “ah,” vakatadza kuzvitenda. Zvainge zvakanyanyisa, munoonaa. Zvino vakadzoka, uye ivo, vese, vakafira murenje, hapana kana mumwe chete wavo akayambukira mhiri. Uye,

munoona, kana tikasatenda, isu maMethodisti, maBaptisti, maPresbyterian!

⁹⁷ Ndinotarira kuti mudzidzisi wangu wekare agere pano nhasi. Chiremba Roy E. Davis, vazhinji venyu munovaziva, pano chaipo paFort Worth, pamwe vakagara muno. Ndinorangarira takakurukura zvinhu izvi, makore mazhinji, kwazvo akapfuura. Vakandibhabhatidza mukutenda, imwe chechi yeMissionary Baptisti.

⁹⁸ Uye tarisai, muno, zvino, kana isu...kana—kana tikasvika pamuganhu iwoyo, toti, “Saka zvino, mbiri kuna Mwari, ndakataura nendimi, hareruya!” Handizvo izvozvo. Kana uchikwanisa kuti, kusatenda chero chipi cheShoko iroro, pane chakakanganisika nechiitiko chako. Maona?

⁹⁹ Unosvika paNyika yacho chaipo wobva waona kuti iripo. Woona kuti Jesu akamuka. Ari pakati pedu. Unonzwa Shoko rinotevera mharidzo, uye zvakadaro hauRitendi, unoziva zvinoitika? Ipapo ndokubva vafira murenje chaimo. “Kana tikatadza nemaune mushuremekunge tagamuchira ruzivo rweChokwadi, hapachisina chimwe chibayiro chechivi.” Ndizvo zvatinotaurirwa neBhuku raVaHebheru.

¹⁰⁰ Uye zvino tarisai, apo patinoona zviratidzo zvikuru zvenguva yekupedzisira zviri munyika, izvo zvaVakavimbisa, zviri kutowedzera zvakadini kutiyambira kuti nguva yakwana. Siya kusatenda. Huyai pamwe chete. Tinofanira kudanana uye nekutenda, nekuzvipatsanura kubva kunyika.

¹⁰¹ Cherechedzai, vaisafanira kungouya pamwe chete votaura nezvemharidzo. Vafanira kupinda mairi, kupinda pasi peropa. Kwete kuuya vachiti, “Munoziva, Mosesi akatiudza. Mutumwa, akati, akatiudza kuti tinofanirwa kuva neropa. Munofungei nezvazvo, vakomana?” Zvakanga zvisiri izvo. Itai kuti gwayana riuraiwe, uye muise ropa kumusoro uko!

¹⁰² Tinogona kuuya togara uye tobvumirana neShoko, nezvimwe zvese, asi tisina Chiratidzo chacho, zvinotibatsirei? Hazvibatsire. Pindai pasi paCho. Aive asina mungava kune chero munhu aive kunze asiri pasi peropa iroro. Uye haAna mungava nechero munhu, nhasi, ari kunze asiri pasi peChiratidzo.

¹⁰³ Mhuri yese, yaive yakachengeteka chete pavaive vari pasi pechiratidzo, uye chiratidzo chichiratidzwu pachena. Mhuri yese! Munozvitenda here? [Ungano inoti, “Ameni.”—Mupepeti] Nhasi tinofanirwa kurangarira izvozvo, vanhu. Vana vedu!

¹⁰⁴ Zvino rino zera rekuyaruka risina maturo uye nerock-and-roll, nezvinhu zvatiri kupfuura nemazviri, neese aya pano maBeatles netumbuyu, uye munoziva here kuti zvese zvinomiririrwa pano muBhuku, reBhaibheri? Rinotaura izvozvo muna Zvakazarurwa. Zvirokwazvo, rinodaro. Kuti vanhu, ivo, ivo vari—ivo vari...ivo, ivo, munoona, ivo, havasi...Vakafa. Havagone kumuka. Havana kumbobvira vari Vekusingaperi.

Vakanga vasiri muNdangariro, saka vachaparara. Vachaparara nekusingaperi, vachatsakatika zvachose. Vacharangwa kwenguva yakareba kwazvo, nekuda kwezvavakaita, asi chero chinhu chakange chiine mavambo chine magumo.

¹⁰⁵ Ndeicho chisina mavambo, chisina magumo. Kunongova nemhando imwe chete yeHupenyu Husingaperi. Mhando imwe yeHupenyu Husingaperi, tinoshingairira ihwohwo. Cherechedzai.

¹⁰⁶ Joshua, chitsauko 2 chaJoshua, chipfeve cheMarudzi chaitenda chakange chanzwa, nemhuri yacho, ndokuvaunza pasi petambo tsvuku, yaiva chiratidzo kubva kunhume dzaJoshua. Mutumwa waMwari anoparadza akaremekedza chiratidzo ichocho, uye ichocho chega, muguta iroro. Hapo paive nezvinodiwa naMwari, neveranda vaVo, kuti Mwari vaida chiratidzo ichi, uye ndicho chaive choga. Handina basa kana anga ari meya weguta, kana anga ari munhu mutsvene kupfuura vese muguta, kana vaienda kuchechi hurusa muguta, zvinhu zvese zviri muguta zvakawa kunze kweimba iyoyo. Mwari, voga, vakaremekedza chiratidzo ichocho.

¹⁰⁷ Cherechedzai, Jeriko yakanga yanzwa kuti Mwari vaiita zvinhu zvikuru, asi havana kuteerera kuyambiro.

¹⁰⁸ Ndizvo zvakaita vanhu nhasi vanonzwa izvo zvange zviri kuitwa naMwari mumakore mashoma apfuura, asi havambozviteereri. Simba guru iri renyasha nezviratidzo, sezvaVakavimbisa, “sezvazvaive pamazuva eSodhoma, ndizvo zvazvichava.” Akavimbisa sei kuti chinhu ichocho chaizovapo! Tarisai zvakaitika muSodhoma. Rangarirai, paiva nechiratidzo cheSodhoma. Asi mutumwa, waMaraki 4, ari kufanirwa “kudzosera moyo yevanhu kumadzbaba, madzibaba epentekosti, kudzokera kuBhaibheri.” Hapazovi zvachose poita Bhaibheri, chimwewo chinhu. Iri ndiro chizaruro chose chaMwari.

¹⁰⁹ Uye mumwe munhu anoti, “Saka, ndinotenda chikamu *ichi*, handizive nezve Icho.”

¹¹⁰ Mutumwa chaiye waMwari anokudzosera kuChinhu chacho chose! Maona? Cherechedzai, ndizvo zvinoita Mweya Mutsvene, kukudzosera kuShoko rose raMwari.

¹¹¹ Nyasha dzaVo dzainge dzaratidzwa, kutonga kwaVo kwaitevera. Vaifanira kunge vakatenda kuti vaive vakachengeteka muzvivakwa zvavo zvikuru kwazvo zvemasanano zvavaive nazvo muJeriko, asi vakaona kuti hazvina kushanda.

¹¹² Paifanirwa kunge paive nevamwe ve...pamwe vakapindamo neimwe nzira, paive nevakomana vashoma vakapindamo, ndokuudzwa kuti aunganidze mbeu yose yakatemerwa pamwe chete. Uye akawana...zvino akashandisa

imba yake kuita chechi, ndokugamuchira vatumwa; uye zvakare ndokuzotora vese muguta rake, vaitenda, pasi pechiratidzo.

¹¹³ Mudzimai mumwe mune hupfumi ihwohwo hwese hwakakura! Mudzimai mumwe mudiki, uye iye wemukurumbira wakashata, pamwe akadzingwa kubva kuchechi yose yomuguta, asi akatenda mutumwa iyeye. Zvino mutumwa iyeye akasiya chiratidzo, mucherechedzo, uye Mwari vakaremekedza chiratidzo. Ndizvo zvazviriwo nhasi. Ingo rangarirai, apo muparadzi wehasha dzaMwari akauya, hurongwa hukuru ihwohwo hwakadonha, chiratidzo chakachengetedza imba yake yakachengeteka. Kwete nekuti aive mudzimai akanaka; nekuti aive nekutenda uye akaisa chiratidzo.

¹¹⁴ Zvino ko dai akati, “Hongu, vaya vaive varume Bakanaka, zvirokwazvo ndakafarira mharidzo yavakapa, asi, chokwadi, zvinoita sezvakapusa kuva netambo iyoyo yakarembera kunze kwehwindo rangu, ndichangoidhonzeru mukati”? Ingadai yakadonha. Ingadai yakadonha. Mwari vakaremekedza chiratidzo chete, zvakafanana nechiratidzo chehupenyu chiri muEgipita.

¹¹⁵ Joshua aive mufananidzo waJesu, nekuti *Joshua* zvinoreva “Jehovha-muponesi.” Aive mufananidzo waJesu, aive akatendeka kuchiratidzo chechiratidzo chemutumwa wake chaakange aparidza. Joshua akaramba akatendeka kuchiratidzo ichocho. Vose vaive pasi pacho vakaponeswa, muEgipita. Vose vaive pasi pacho vakaponeswa, muJeriko.

¹¹⁶ Ropa reGwayana mufananidzo nhasi weChiratidzo, kuti Mweya Mutsvene ndiwo Chiratidzo chanhasi. Vose vari pasi paCho vakachengeteka. Vose vari panze vasiri pasi paCho havana kuchengeteka. Muna VaHebheru 13:10 ne20, Vanodaizwa kunzi “sungano yekusingaperi.” Sungano yakare yaive chimwewo chinhu, ino ndiyo Itsva, ino ndiyo “sungano yekusingaperi.”

¹¹⁷ Mwari, vimbiso dzaMwari dzakasungwa neRopa, dzinotisunungura kubva kuchivi nekunyadziswa, nekusiyana neimwe nyika yese. Haufanirwe kupfeka zvakasiyana; chero munhu anogona kupfeka zvakasiyana. Unofanira kunge, muri mukati, wakasiyana. Hupenyu huri mukati; kwete mapfekero, kupfeka. “Humambo hwaMwari hausi nyama kana chokuwa, kana kupfekwa kwenguwo; asi moyo murefu, runako, hunyoro, kutsungirira, muMweya Mutsvene.”

¹¹⁸ Zvino, vimbiso dzinosunungura kubva kuchivi, zvoratidza kuti Mwari havana—havana kumbocherechedza chivi chako. Dhavhidhi akati, “Akaropafadzwa uyo munhu anonzi naMwari haana chivi.” Uye Mwari havazombopomeri chivi pamusoro peChiratidzo ichocho, nekuti Chiratidzo ndicho chiratidzo chakabhadharwa chekuti Mwari vakatochigamuchira kare. Uye une chiratidzo chacho, ku...kutenda kwako kwakachitenga.

Uye une mutengo wacho werudzikinguro rwako mumutumbi mako, kuti uVanamate nekuratidza vimbiso dzaVo pamwe nesimba.

¹¹⁹ *Testamende Itsva* zvinoreva “sungano itsva.” *Ropa* rinoreva “Hupenu.” *Testamende Itsva* itestamende yeMweya Mutsvene, Mweya Mutsvene uchipa huchapupu hwezvakamutswa naJesu Kristu kubva kuvakafa, ndokuratidza kuti Jesu akazadzisa zvese zvinodiwa kwatiri, uye mupenyu nhasi. Chiratidzo chinoratidza kuti Mupenyu kuti azvibatanidze pachaKe pamwe nesu, maererano nevimbiso yaKe. Zvino munhu angaverenga sei Bhaibheri oona kuti Akazivivimbisa, uye oona Kristu achidzoka mumazuva ano ekupedzisira ari muchimiro cheMweya Mutsvene uye ozviratidza pachaKe kuti mupenyu? Ndicho Chiratidzo. Ndiwo mucherechedzo. Ndiwo mubhadharo wakabhadharwa.

¹²⁰ Rega kumbofa wakazembera pane kumwe kutekenyedza. “Ndakananza chando chichimhanya nekumusana kwangu. Uye—uye nda—ndakafemedza chimwe chinhu; ndikaona rimwe ropa mumaoko angu,” kana mamwe mafuta. Kana kuti—kana kuti, “Ndakahwinha Bachelor’s Degree rangu.” Kana kuti, “Ndakatamba muMweya. Ndakadanidzira. Ndakataura nendimi.” Zvinhu izvozvo zvinogona kunge zvakanaka. Handina chandinopesana nazvo, asi handizvo zvandiri kutaura nezvazvo.

¹²¹ Ndiri kutaura nezvekuratidzwa kweChiratidzo, Jesu Kristu, akamuka uye ari matiri zvino, Achizvizivisa pachaKe, kusimbisa zvakare Shoko raKe rakavimbisa rezuva rino. Ameni. Zvadaro iwe naKristu muri mumwe. Mwari naKristu ndemumwe. “Zuva iroro, muchaziva kuti Ndiri muna Baba, Baba vari maNdiri; Ini mamuri, uye imi maNdiri.” Havo Mwari vachiratidzwa munyama yemunhu, vachizviratidza pachaVo kuva vapenyu, mushure mezviuru zviviri zvemakore. Ndicho Chiratidzo.

¹²² Kana usiri mukati, pinda nekukurumidza, shamwari. Zvinogona kunge pachisina nguva zvakanyanya. Hativivi.

¹²³ Ratidzai Hupo hwaVo, *Testamende Itsva*, *Ropa*. Uye Rinorarama zvino, richisimbisa. Uye nekuti Iye aripo, tine kodzero yezvose zvaAkaitengera. Murume ane rubhabhatidzo rweMweya Mutsvene, kana mudzimai ane rubhabhatidzo rweMweya Mutsvene, ane kodzero kune zvese zvatakatergerwa naJesu, nekuti ndicho chiratidzo chatinacho. Ndiro simba rekutenga.

¹²⁴ Ngatiti semuenzaniso unoti, “Nhai, Hama Branham, munorevei?”

¹²⁵ Pano, kuzvijekesa zvino, uye ndinoda kuti imi vanhu vanorwara mubate izvi. Tarisai, kana ndaiziya nenzara, uye ndichiziva kuti rofu rechingwa, ngatiti, rinoita masendi makumi maviri nemashanu, zvino kwouya imwe hama yoti, “Heano masendi makumi maviri nemashanu, Hama Branham. Muri kuziya nenzara; torai kobiri iri remasendi makumi maviri

nemashanu.” Zvino, munoziva, ndinogona kungofara nekobiri iroro remasendi makumi maviri nemashanu riri muruoko rwangu sezvandingaite nechingwa chiri muruoko rwangu, nekuti ndine mutengo. Ndine chiratidzo chinowana chingwa. Uye chingwa chiripo ipapo; uye chinhu choga, ndakabata chiratidzo, kobiri remasendi makumi maviri nemashanu rinotenga chingwa, ndinogona kungofara nechiratidzo sezvandingaite nechingwa.

¹²⁶ Zvino, kana uine rubhabhatidzo rweMweya Mutsvene, ndicho Chiratidzo chekuti une zvinhu zvese zverudzikinguro zvakafirwa naJesu, ndezvako, zviri muruoko rwako. Unotya kuzvitora here?

¹²⁷ Kana ndikariisa muhomwe yangu, ndoti, “Saka, handizive kuti ndinogona kutenga chingwa ichocco here kana kwete,” Ndichafa nenzara. Asi rangarirai, mutengesi anoti, “Ndine chinhu chimwe chete chinodiva, VaBranham. Kobiri rimwe remasendi makumi maviri nemashanu, munogona kuwana rofu rechingwa.” Ndinacho! Ameni. Zvaringana.

¹²⁸ Ndicho chikonzero tisingaone zvinhu zvakawanda zvichiitwa nhasi, Chiratidzo hachina kuratidzwa pachena, Chiratidzo chemazvirokzwavo. Oo, tine mhando dzese dzezvenhema, asi ndinoreva Chiratidzo chemazvirokzwavo.

¹²⁹ Tarisai, zvino patinocherechedza nekuratidza Chiratidzo, Hupenyu hwakatorera Chiratidzo, Ropa rinotaura rakatimiririra. Rangarirai, Ropa resungano rakacherechedza pamwe neChiratidzo, uye Shoko rinotipa kugutsikana nezve vimbiso. Chiratidzo ndicho chiratidzo chekuti mubhadharo wakaitirwa isu.

¹³⁰ Zvino, kana iwe usina kubatanidza mune izvozvo, saka, chokwadika, haumbofi wakawana chinhu; uri kungofamba nemumutsara wekunamatirwa, uchifamba uchidzokera kunobuda; uchifamba kuenda kuwartari, uye uchitarisa mudenga, uchifamba uchidzokera kunobuda.

¹³¹ Asi, oo, hama, kana Chiratidzo ichocco chichinge changoiswa mumoyo mako—mako—mako, uye woziva kuti rumuko rwaJesu Kristu mauri, chimwe chinhu chiri kuitika. Hapana chinhu chichakushandura. Unoziva kwaunobva. Kuteerera kuzere kuShoko rose raMwari kunokupa kodzero kuChiratidzo, uye hapana chimwezve. “Akaropafadzwa uyo anoita mirairo yaVo yose, anozogona kuva nekodzero kuMuti weHupenyu.”

¹³² Zvino, patinonamata, tinofanira kuva neChiratidzo chekuunza pamwe neminamato yedu. Zvino musatadza kuzvibata izvozvo. Paunonamata, unofanira kuva neChiratidzo chekubata pamusoro pemunamato wako; kana usiri, ramba uchinamata kusvikira Chiratidzo chauya, nekuti hauna kuvimbisia kuchigamuchira. Munona, unofanira kuva

neChiratidzo ichi kutanga; ndiwo mubhadharo wekubhadhara, kutenda kwako kwekuzvitenda.

¹³³ Zvino, chiratidzo chekuteerera kuzere. Kutya kwaenda. Pauro anotiudza kuti, “Ropa rinotaura zvinhu zviri nani.”

Unoti, “Ropa rinotaura?” Hongu, Ropa rinotaura.

¹³⁴ Muna Genesi 4:10, tinoona kuti Mwari vakataura kuti—kuti raKaini...kana, “Ropa raAbheri rakataura richibva muvhу.” Tinoona muna VaHebheru 12, kuti, “Ropa resungano yaKristu rinotaura zviri nani kupfuura iro raAbheri.” Maona? Tinoona kuti, Ropa rinotaura, Rinotaura rakakumiririra. Hupenyu huri mauri hunotaura kubva muRopa rakadeurwa. Ameni. Oo, hama! NdinoShuvira kuti munhu wese agone kuzviona. Maona? Kana uchikwanisa kuona kuti chii, ndihwo Hupenyu huri mauri. Munoona, Ropa iroro riri kukubatanidza pamwe naRo. Ndicho Chiratidzo. Iro...Zvazviri, Ropa rakadeurirwa iwe; wakagamuchira, uye Hupenyu hwakapinda mauri. Une Chiratidzo, ndiwo Mweya Mutsvene.

¹³⁵ Zvino patinonamata, tinofanira kuva neChiratidzo chekuunza pamwe neminamato yedu, sezwandataura, uye zvino tizvitendere pachedu uye toisa Chiratidzo kumhuri yose, semuEgipita, Jeriko, kana mungava muna Mabasa 16:31. Tinoona kuti Pauro akaudza mukuru wezana muRoma, achiti, “Tenda iwe, uye neimba yako yose ichaponeswa.” Chishandisire kumhuri yako. Kana uine mwana asina kuponeswa, isa Chiratidzo pamusoro pake chaipo, uti, “Ishe Mwari, ndinomutora.” Gara ipapo chaipo. Kana uina amai kana mudikanwi akarasika, isa Chiratidzo ichocco pavari, uti, “Ishe Mwari, ndinomutora.”

¹³⁶ Buditsa kunze, ose zvawo marara enyika, kubva mumba mako, uChigadzirire. Pisa zvikabudura zvako. Kandira matafura ako emakasa kure. Rasa fodya dzako. Rasira kusatenda kwako nemapepa ako echechi mubhini, uko kwaanobva. Ameni. Zvadaro wave kugadzirira. Zvino woitei? Wobva waisa Chiratidzo mumunamato, nehumbowo hwemazvirokwazvo, kutenda kwemazvirokwazvo. Chiise, Chiise neruvimbo rwose. Paunoisa Chiratidzo, ziva kuti unge wakachena. “Kana moyo yedu isingatipomeri, ipapo tinowana chikumbiro chedu.”

¹³⁷ Chero bedzi imi vanhu muchiita zvinhu izvozvo zvakaipa, muchakumbira sei Mwari kuti vakuitirei chero chinhу imi muchiziva kuti muri kukanganisa? Ndicho chikonzero tichingodzedzerekа pano uye todzedzerekа tichidzoka. Handisi kutaura izvi kurwadzisa. Ndiri kutaura izvi kutwasanudza, kuti zvinhu zvigadzirike. Muchazvivakira sei pamatsito eSodhomа neGomora? Dzokai!

¹³⁸ Masangano nevashumiri vakarega vanhu vachiita chero hazvo, uye vasingapomerwi, uye vongoisa zita ravo mubhuku vovadana izvi, izvo, uye nezvimwewo, apo zviri chinyadziso.

Uye zvave pekuti kutenda ndechimwe chinhu chisina kana... havatombozivi kana zvachose kuti kunombori chii. Ivo, vane tariro, asi vasina kutenda.

¹³⁹ Unofanirwa kudzoka, kune, zvese zvakagadzirisa uye zvakachena. Zvino tora Chiratidzo chako, chaunoziva kuti ndiJesu Kristu mauri, woChiisa. Kana chimwe chinhu chikasaitika, pane chisina kumira zvakanaka; dzokera zvakare, wakabata chinhu chisicho muruoko rwako. Vakazvivimbisa. Ndivo Vakazvivimbisa. Chishandise. Verengai VaEfeso 2:12, imwe nguva, kana imi—kana imi muchida, zvino muchazviona ipapo.

¹⁴⁰ Cherechedzai muna VaHebheru 9:11, zvakare. Pauro akati, "Kushumira Mwari mupenyu, nemashoko mapenyu." Ndisingataure sekuti ndongokwira kumusoro sezvaisiitwa nemuHebheru, otora chibairo chake, zvino ouya achidzika nemugwagwa, aine nzombe huru yakakora, zvino oisa maoko ake pamusoro payo ozvibatanidza, odeura ropa, odzokera aruramiswa. Jehovha vanga vachiida. Akazviita. Zvino chizvarwa chinotevera, pamwe vakatonhora zvishoma; mumwewo munhu, akatonhora zvishoma. Chinhu chekutanga munoziva, yakazova tsika yemhuri.

¹⁴¹ Ndizvo zvaita pentekosti kwatiri, tsika yemhuri. Tinodzika zasi, toti, "Chirongwa chiya chepaterevhizheni changa chisina kunaka here manheru ano? Handizivi zvavaita zasi kuchechi? Ishe Jesu, podzai..." Oo, nhai vedu! Maona? Yemhuri tsik-... "Munoziva, ndakataura nendimi rimwe zuva. Ndiri weiyi, kana iyo, munoziva. Uh-huh." Oo, itsika yemhuri!

¹⁴² Munoziva zvakataurwa naMwari? Mwari vakati, "Mafuta nemakondohwe enyu zvinonhuwa mumhuno yangu. Ndizvozvo, zvibayiro zvenyu zvave zvinonhuwa."

¹⁴³ Uye ndizvo zvakaitawo zvibairo zvePentekosti, nekutamba nekuenderera kwedu kwemasangano, uye nemadzimai edu nevarume vachiita nenzira yavanoita, chimwe chimiro chehumwari; vowanza mumhanzi, zvino mumwe munhu osvetuka-svetuka kwechinguva; uye zvese zvobva zvatopera, semugomo wemvura wakandirwa pazviri, kana Shoko raMwari toti raya richitura chimwe chinhu. Chii chiri kunetsa? Zvibayiro zvenyu zvinotanga kunhuhwa pamberi paJehovah.

¹⁴⁴ Uye paiva panguva iyoyo apo Isaya akasvika panzvimbo, zvino ndokuvaudza, "Ndichakupai chiratidzo chekusingaperi, mhandara ichabata mimba." Munona, hezvoka izvo. Kwete zvimiyo zvakafa nezvitendwa, kwete; asi mashoko anorarama, Mwari vanorarama vakamuka kubva kuvakafa, uye vari kurarama pakati pedu.

¹⁴⁵ Vamwe vavo, chechi idzi dzakadaro, dzinotenda zvinhu izvi, vanoramba kuti kune chinhu chakadaro seChiratidzo. Zvakanaka, mumwe muchinda akaedza kundiudza, "Vaapostora

gumi nevaviri chete ndivo vakagamuchira Mweya Mutsvene. Ndivo chete vaivapo. Hongu.” Oo!

¹⁴⁶ Asi isu vanotenda Shoko, tinoziva zvakasiyana, tinoziva kuti uhwu Hupo hunorarama. Ko tinoziva sei kuti Hupo hunorarama hwaKristu, Mweya uri pakati pedu? Hunoita zvimwe chetezvo zvaAnoita. Ndihwo humbowo wahwo. Muzambiringa unozivikana nemuchero waunobereka. Uyezve kana muzambiringa wekutanga iwoyo wakabuda uye vakanyora Bhuku reMabasa shure kwawo, uye zvimwe chete zvakaitwa naJesu, zvakaitwa nevaapostora; zvino kana muzambiringa iwoyo wabuda zvakare, unoita chinhu chimwe chete. Maona, VaHebheru 13:8 inoti ndiYe mumwe chete, oo, ini zvangu, zvinoratidza kuti Mwari vakaMumutsira isu, maererano neShoko raVo rakavimbiswa. [Chibenga chisina chinhu patepi—Mupepeti]

¹⁴⁷ Chisimbiso chevimbiso! VaEfeso 4:30 inoti, “Usachemedza Mweya Mutsvene waMwari, wawakasimbisa nawo kusvikira pazuva rerudzikinguro rwako.” Kwete kusvikira parumutsiriro rwunotevera. “Kusvikira pazuva rerudzikinguro rwako!” Uchibhabhatidzirwa maUri, maererano naVaKorinde Vekutanga 12. Uye maAri mune huzaro, uye hapana chivi chinocherechedzwa maAri. “Uyo akabarwa naMwari haaiti chivi. Mbeu yaMwari inogara maari, uye haagone kutadza.” Angadaro sei, icho Chiratidzo chiripo? Chiratidzo ndicho chiratidzo chekuti agamuchirwa.

¹⁴⁸ Uye, zvakanaka, unoti, “Ndinotadza.” Saka, zvinoka hauna kumbobvira wava neChiratidzo. Maona?

¹⁴⁹ Chiratidzo ndirwo ruzhowa, chinoratidza kuti mutengo wabhadharwa. Kana Satani akaedza kuzvitambidza kwauri... Chingofunga izvi. Kana Satani akaedza kukutambidza humwe hurwere, kana akaedza kukutambidza chimwe chinhu, unoziwa zvekuita? Muratidze Chiratidzo chako. Chokwadi, hurwere hunorova Mukristu. Muratidze Chiratidzo chako, uye umuratidze kuti uri mudziyo wakatengwa waMwari. “Dzivisa dhiyabhore, uye achakutiza.” Bata Chiratidzo pamusoro pekutenda kwako kusingazungunu ke muShoko raKe rakavimbiswa.

¹⁵⁰ Mwari neimwe nguva vakapa chiratidzo chemuraraungu sechiratidzo. Ndava kuvhara. Vakapa chiratidzo chemuraraungu sechiratidzo. Ndingori neangaita maminitsi gumi, uyezve nokuita mutsetse wekunamatirwa. Vakangoramba vakatendeka kuchiratidzo ichocco. Vakadaro here? [Ungano inoti, “Ameni.”—Mupepeti] Vachiri kudaro nazvino. Zviuru zvese izvi zvemakore, haVana kana kamwe chete zvako, nguva imwe chete, vakakundika kuchiratidza pachena. Vaive vakatendeka kuchiratidzo ichocco, zvinotiratidza kuti

Vanogara... uye havafi vakakundikana kuremekedza zviratidzo zvaVo. Handina basa kana zviri...

¹⁵¹ Kana Jesu akasauya kwemakore zviuru gumi, uine Chiratidzo, Achange achiri kufanira kuChiremekedza. Zvisinei nokuti zvinhu zvakawanda zvakadii zvinoshanduka, uye chero zvimwewo, Anofanirwa kuremekedza Chiratidzo ichocco. Akati Aizodaro. Zvakanaka. Anotitarisira kuti tiratidze pachena Chiratidzo chaKe, pamusoro pekutenda kwedu kwatakapiwa naMwari, kune chinamato chega-chega chakatsauka chisingatendi chiri munyika uye nepasi rose, chinotenda kuti zviratidzo nezvishamiso hazvitevere vatendi. Zvino iva wakatendeka kuChiratidzo ichi, uye Chinoratidza kuti mubhadharo wakabhadharwa uye takagamuchirwa kuitira rumuko, tichiva neHupenyu hweChiratidzo matiri.

¹⁵² Iyo iMharidzo inocheka, asi iChokwadi. Ndizvo zvatinoda, ico Chokwadi. Mwari vaticbatsire kuziva Chokwadi. "Uchaziva Chokwadi, uye Chokwadi chichakusunungura." Ndinotaura kuti Jesu Kristu mumwe chete zuro, nhasi, nekusingaperi. Ndinotenda kuti Mwari vanopa Mweya Mutsvene seChiratidzo, iko zvino, nguva pfupi eksodho isati yaitika, ye—yeMwenga uchibuda muchechi.

¹⁵³ Ndinotenda kune hupenzi hwakanyanya kwazvo, uye nevanhu vachiti vakadanidzira, vakataura nendimi. Ndinotenda muzvinhu izvozvo; asi haugone kuvimba nazvo. Ko ungavimba nazvo chirudzii, zvino wobva waramba Shoko? Maona?

¹⁵⁴ Chiratidzo iShoko rakaratidza mauri, richizviraramira pachaRo kunze. NdiMwari vari kuva mududziri waVo pachaVo. Haufanirwe kuti uti, "Saka, zvino, iwe dudzira ndimi dzangu." Izvozvo handizvo. Vanodudzira hupenyu hwako neShoko. PaVanotora shoko rako, zvauri, uye voratidza Shoko raVo kuburikidza neipapo, hapatodi chero dudziro ipi zvayo, yatogara iripo. Mwari vanoita dudziro yaVo pachaVo, uye takave nevimbiso idzi dzezuva rino.

¹⁵⁵ Oo, Dallas, imi boka rakanaka reMakristu, musakukurwa nezvinhu izvi nhasi, zvamunoona zvichitenderera, nekuti zvichaparara. Ridzai Chiratidzo ichocco nguva dzose, ratidzai Chiratidzo ichocco. Verengai Bhaibheri. Uyai kune zvese. Uye kana mwuya wako uri mauri usingati "ameni" kune Izvozvo, ipapo zviri nani udzokere, chinjanisa zvauinazvo, neChiratidzo; iwe haunaCho.

¹⁵⁶ Ndinoziva kuti izvi zvakawanda kwazvo kuzvitaura pano mumasikati mamwe. Uye izvozvi dzave four-thirty. Nguva yakwana zvino, uye kana tikakwanisa kubuda nafive o'clock nemutsara wekunamatirwa.

¹⁵⁷ Munotenda here kuti Jesu Kristu anorarama uye anotonga nhasi? [Ungano inoti, "Ameni."—Mupepeti] Munotenda here kuti zvandakuudzai iChokwadi? ["Ameni."] Ndicho Chiratidzo,

chacho chinodiwa. Ini ndinogona bedzi kutaura zviri Chokwadi. Ndinongotaura bedzi izvo zvandinoona, izvo zvandinonzwa, izvo zvinozarurwa kwandiri. Uye sei ndichitaura izvi, pane makumi ezviuru zvakapetwa zviuru zvenguva, hapana kana nguva imwe chete yazvakambokundika kuva chokwadi, zvino anofanirwa kuva ari Mwari. Anofanirwa kuva ari Mwari. Zvakanaka, ko Mwari vaizopa shumiro yakadaro kune mumwe munhu ainge asingazivi zvavari kutaura nezvazvo here? [“Kwete.”] Ko Angazvizivisa pachaKe semuoni here ipapo, vobva vatendeuka vomupa Shoko rakanyonganiswa? [“Kwete.”] Muchinda anoRiramba, ndiye akavhiringidzika. Uye Mwari havana kuvhiringidzika. Mwari ndivo mududziri waVo pachaVo.

¹⁵⁸ Gamuchira Chiratidzo! Usazorora pakujoina chero chechi kana chero zvimiro, kana chero chinhu. Wana Chiratidzo! Chibate. Ndicho chete chinhu icho Mwari chavanocherechedza. Kana wasvika panguva iyoyo, kana zvasvika pakufa kwako, zviri nani ubate Chiratidzo ichocco pamusoro pako; uchiziva kuti muzuva rekuuya kwaKe, rumuko irworwo, ndinogona kuratidza Chiratidzo ichocco. Hachizove mumutumbi uno, wakatoora; asi muMweya uno, usingafi, Hupenyu Husingaperi, Chiratidzo chinozorora ipapo. Uye Akavimbisa, “Ndichamumutsa zvakare nezuva rekupedzisira.”

¹⁵⁹ Jesu Kristu mumwe chete iyeye ari pano. Ndiye Mutumwa. Ari... *Heino* Mharidzo, uye Ndiye Mutumwa pano kuzivisa Mharidzo yaKe. Handisi Mutumwa. Ndiye Mutumwa, uye *Ino* ndiyo Mharidzo. Zvino kana uine mweya usingabvumirane naYo, ko angava sei Mutumwa weMharidzo? Chiratidzo chega ndicho ChichaIzivisa. Ameni.

¹⁶⁰ Ndinonzwa manyukunyuku ekunamata. Ndinonyatsodaro. Ndinonzwa sekunge ndinogona kubhururuka ndichienda zvino, nekuti ndinoziva Wandakatenda, uye ndakaona hupenyu hwangu hwakabatanidzwa naYe murumuko rwaKe. Hupo hwaKe huri pano. Hugamuchirei, shamwari, ndapota zviitei, zasi mumoyo menyu.

¹⁶¹ Ndinoziva kuti tese tinouya pano paartari tichinamata. Ipfungwa yakare yechiMethodisti. Havana kumbobvira vaita izvozvo muBhaibheri. Bhaibheri rakati, “Vose vakatenda vakabhabhatidzw.” Ndizvozvo chaizvo. Hakuna chinhu chakadaro sekudaizirwa kuwartari muBhaibheri. Ndechimwe chinhu chatakawedzera, chinova chakanaka. Chero chinhu Mwari chavanoropafadza, chakanaka.

¹⁶² Sekuzodza kwavanoita micheka. Hakuna kumbobvira kwaita chinhu chakadaro muBhaibheri. “Vakatora kubva pamuviri waPauro mahengechepfu nemaapuroni.”

¹⁶³ Asi chero nzira yaunoda kuzviita nayo, zvakanaka, muchigaro chako, paartari, chero papi zvapo. Chinhu choga,

isa Ichocco, Chiratidzo kwauri. Wobva wazviongorora pachako, uye wotarisa kuti imhandoi yehupenyu huri kuitika, woona kuti Chakaiswa here kana kuti kwete. Kana Chisina, chibva waisa zvauinazvo, parutivi, ugodzoka, kusvikira Chiratidzo chaiswa.

¹⁶⁴ Ngatinamatei. Baba veKudenga, pamwe nda—nda—ndataura zvakaomarara, asi, Ishe, ko chipikiri chinobata sei kunze kwekunge machikomerera? Ndinonamata, Baba, kuti zvikomererewe mumoyo yevanhu, kuti vaone kuti hachisi chinhu chakakwenenzverwa. Hakusi kuti ndiri kuedza kutsvaga kuzivisa rimwe sangano, rimwe dzinza, chimwe chitendero chakatsauka, mumwe munhu, kana ini pachangu, kana chero mumwewo munhu. NdiJesu Kristu. "Ndichakanda masangano ese iwayo pamwe chete," matanhatu kune mumwe nehafu yedhazeni kune mumwe, maererano neShoko renyu. "Mai chipfeve chakare," Bhaibheri muna Zvakazarurwa 17, "vaive mai venumwe nemumwe wemhombwe." Uye havaigona kuve varume. Vaive mhombwe, uye vese vakapinda mumubhedha wenyika. Uye tinoona kuti chakazviita, maPentekosti nevose.

¹⁶⁵ Asi, Jesu, Munoramba muri Jesu. Ngavarege kuteerera kumharidzo yechechi; asi Mharidzo yaKristu, Shoko. Dai Mazvibatanidza pacheNyu, Ishe, nhasi, nevatendi. Podzai vese vanorwara. Regererai zvivi zvedu, Ishe. Ndi—ndinonamata, semuranda weNyu, ndapota ndiregerereiwo zvivi zwangu, uye regereraiwo zvivi zvevanhu ava. Ndinovimba, Ishe. Mumwe nemumwe wavo pasina kupokana akabatsira mukupa mupiro, kubhadharira zvi—zvivakwa, uye vakashandisa mari yavo, uye vaka—vaka—vakaita zvese, Ishe. Oo Mwari, ndinonamata kuti pasave neumwe wavo anozvipotsa, Ishe. Dai munhu wese!

¹⁶⁶ Ndi—ndinozviita nokuperera, uye zvakadaro, Ishe, unofanira kutorevesa zvakaomarara. Tinoziva, kugadzirisa rudo. Rudo rwunogadzirisa. Uye ndinonamata. Nekuti ndicho chikonzero Makagadzirisa vanhu veNyu, nemhaka yekuti Maivada, uye chivi chese chinofanira kupindurirwa.

¹⁶⁷ Uye, Baba, ndinonamata kuti Mugoregerera zvivi zvedu zvino, tichizvireurura. Takambeya kure-kure, Ishe. Ndinobatanidzwa nevanhu vechiPentekosti ava, Ishe. Ndi—ndiri mumwe wavo. Uye ndi—ndinonamata, Mwari, kuti Mutiregererewo tose. Uye torai vamwe vevatungamiriri ava muvatendeudze, uye—uye movaita kuti vatarise vakanangisa kuKarivhari ikoko kamwe chete, uye ipapo vanozokanganwa pamusoro peizvo zvavanofanira kuva, mukuru wendunhu kana mubhishopi, kana chero chachingave, uye nokuziva kuti hatisi vakuru muHumambo uhu. Tose tiri vana vaMwari. Ndinonamata kuti Muchatibatsira zvino. Zvizivisei pacheNyu pakati pedu, nhasi. Tinokumbira muZita raJesu Kristu. Ameni.

¹⁶⁸ Zvino tisati tatanga mutsara wekunamatirwa, panogona kunge paine mumwe munhu pano asina kumbobvira ava pano

kumashure. Handizive kuti ndiwe ani, asi Mwari vanokuziva. Kana ndataura Chokwadi, regai Mwari vazvizivise, kana chiri Chokwadi kana kuti kwete, ndiwo humbowo hwach. Kana Akamuka kubva kuvakafa, Ndiye mumwe chete zuro, nhasi, nekusingaperi. Akati muna Johane 14:12, “Uyo anotenda,” kwete uyo anotenda zvekabanga. “Uyo anotenda maNdiri, mabasa aNdinoita naiye achaaitawo.” Ndizvozvo here?

¹⁶⁹ Mumwe munhu akati, “‘Makuru akadarika muchaaita.’” Ndizvozvo chaizvo. Akati, “Saka, isu tinoparidza Vhangeri, rakadarika pakukura.”

¹⁷⁰ Chimboitaka zvinhu zvaAkaita, ndizvo zvinoratidza kwandiri, munoona, tinobva tozotaura pamusoro pezvakadarika pakukura. Ini ndinogona kukuratidzai zvinhu zvakadarika pakukura zvaAri kuita iko zvino kudarika zvaAkaita paAiva panyika, uye hakusi kungoparidza Vhangeri, zvakare; zviri muzviratidzo nevishamiso. Hatina nguva yazvo. Ingotendai. Uye dai Mwari veKudenga, Vakamutsa Jesu Kristu kubva kuvakafa, uye vakaMuratidza pano ari mupenyu, kwatiri, mushure mezviuru zviviri zvemakore, vachizivisa Mharidzo ino, kuti Ichokwadi. Chiratidzo chinofanira kuiswa.

¹⁷¹ Zvino, imi mune zvirwere nematambudziko, namatai, mukungorevesa itii, “Ishe, ndinotenda kuti Muri ‘Muprista Mukuru anogona kubatwa nemanzwiro ehutera hwedu.’ Uye tinoudzwa nemushumiri uyu pano, kuti Munesu, pano, zvino ndinoda kuti Muve pano nesu nekuzviratidza pacheNyu.” Zvino namatai, mumwe nemumwe wenyu.

¹⁷² Zvino zviri kuna Mwari kuti vataure chimwe chinhu. Inguva yakadini! Oo, ini zvangu! Ndinoshuva kuti dai magona kungoziva chimwe chinhu, manzwiro aunoita kana Iyeye auya, nyika yose ndeyako. Ameni. Hakuna dhimoni richaita chimwe chinhu, iro rakatokundwa. Ishe vangu vari pano. Zvese zviri mumaoko edu. Ameni.

Ndapota nyararisai. Musafamba. Garai makanyarara.

¹⁷³ Imi muri muma hwiricheya, nezvimwe, musafunge kuti hamuchabatsiriki. Tendai. Iwe—iwe, wakapfuura nemumitsara yekunamatirwa, ukatadzirirwa nekutadzirirwa. Akange asiri mushumiri akakunamatira, akakundikana. Kutenda kwako, uye watanga kufunga kuti hauna chinhu chauchaita. Iwe tenda.

¹⁷⁴ Pano, hechinoi Chiedza ichi pano, pamusoro pemudzimai mudiki wechitema agere kumashure kuno, akamira nemaoko ake akasimudzwa mudenga sekudai. Hongu. Wanga uchinamata. Hongu. Unonditenda here kuva muporofita waKe, kana kuti muranda waKe? Handifanire kutaura izvozvo, nekuti zvinogumbura vanhu zvakanyanya. Une wakanaka . . .

¹⁷⁵ Heuno murume muchena, mudzimai wechitema, sekunge zvaise Ishe wedu nemudzimai patsime, marudzi maviri akasiyana. Akavaita kuti vazine kuti hapana mutsauko mune

marudzi. Ruvara rwedu harwuna kana nechekuita nazvo. Tose tiri... Tinogona kupanana pakuwedzerwa kweropa. Mwari vakaita, neropa rimwe chete, marudzi ose.

¹⁷⁶ Muri kutemwa nemusoro, kutema kwakanyanyisa. Uyezve mune mutoro pamoyo wenyu, ndewe mwana uyo. Uye imi... Anotsimbirirwa. [Hanzvadzi inoti, "Ameni."—Mupepeti] Ndizvozvo chaizvo. Ichokwadi here? ["Ameni."] Ndizvozvo.

¹⁷⁷ Mudzimai uyu agere neche apo kubva pamuri apo, anoita sekunge anobatanidzwa nemi, anova amai venyu. [Hanzvadzi inoti, "Ameni."—Mupepeti] Ndizvozvo. ["Mwari ngavarumbidzwe!"] Uye vane chimwe chinhu chakanganisika pavari.

¹⁷⁸ Munonditenda here, mudzimai? [Amai vanoti, "Ameni."—Mupepeti] Munodaro? Dambudzikoro renyu kurwadza kuri parutivi rwenyu. Ndizvozvo. Idivi renyu rerudyi rinorwadza. Ndizvozvo here? Simudzai ruoko rwenyu, kana zviri izvo. Hapachazokunetsai zvakare. Munotenda kana Mwari vakandiudza kuti ndimi ani? Mai Lowell. ["Ameni."] Ndizvozvo. ["Ameni."] Zvakanaka, endai henyu, Ishe Jesu vanokupai chikumbiro chenyu.

¹⁷⁹ Kumucheto uko chaiko kweuko kune mumwe mudzimai mudiki wechitema akagara, akatarisa, zvango—zvangoda kumubvarura kuita zvidimbu. Akanyatsotarisa kwandiri chaiko. Anozvitenda. Icho, hamusi here kuona Chinhu icho apo chaipo paari? Ari kurwara nedambudzikoro reitsvo. Ndizvozvo chaizvo. Zvose zvapera zvino; Akupodzai. Ameni.

¹⁸⁰ Ko madii matenda? "Kana mukatenda, zvinhu zvose zvinogoneka." Munozvitenda here? [Ungano inoti, "Ameni."—Mupepeti] Heunoi... Tarisai vanhu vechitema! Kutenda kwenyu kuripi, hama dzechichena?

¹⁸¹ Heunoi mudzimai wechitema akagara pano chaipo, akanyastotarisa kwandiri chaiko, akaita semudzimai muhombe. Ane dambudzikoro neibvi rake. Ane dambudzikoro zvakare, ane dambudzikoro remoyo. Hongu. Uye ane hutera, kurova-rova kwemoyo nezvimwe zvakadaro, kunyanya paunenge uchiedza kurara pasi, kuzarirwa. Maona? Zvakaitika nezuro husiku. Rangarira, ini handisi kuverenga pfungwa dzako, asi ndinoziva zvawakanamatira. Wanga uchida kudanwa nokuda kweizvozvi, nhasi, zvino Vakupindura. Zvino iwewo zvakare haukwanisi kusimuka, nekuti une arthritis. Ndizvozvo. Uyezve, chimwe chinhu, une dambudzikoro remudumbu, ranova bundu mukati medumbu. Ichokwadi. Zvino unonditenda here kuva muporofita waKe? Ndichazvitura, zvisinei. Tenda, uye uchapora.

¹⁸² Ko dambudzikoro *renyu* remudumbu? Munotenda here kuti Mwari vachapodza dambudzikoro *renyu* remudumbu, vakagara apo, zvakare? Munozvitenda here? Zvakanaka, saka munogona kuwana kupodzwa kwenyu kwemudumbu. Ameni.

¹⁸³ Munoda here kurega kuputa fodya, apo, mudzimai? Munotenda here kuti Mwari vanokuitai kuti murege kuputa? Manga muchiedza kwenguva yakareba. Mune dambudzikio remudumbu, zvakare; manga muchiedza kurega fodya. Ndizvo zviri kukonzera dambudzikio renyu remudumbu. Muchairega here? Ndinoiramba ngaibve pamuri, muZita rajesu Kristu, nekuda kwekutenda kwenkuMubata.

Ndinokupikisai kuti mutende Mwari!

¹⁸⁴ Heuno mudzimai mudiki akagara apo achinamatira wake...mudikanwi ari muchipatara, ari kufa, nekenza. Ndizvozvo. Ndisekuru. Ndizvozvo. Munodaro muri...Muri mudzimai wemushumiri. Tendai nemoyo wenyu wese, murume wacho achapora.

¹⁸⁵ Ndinokupikisai kuti mutende Mwari! Chii ichocho? Kuratidzwa, Jesu Kristu iyeye. Unoti, "Kristu chii?"

¹⁸⁶ Ndiye Shoko. "Pakutanga Shoko rakanga riripo, Shoko rakanga riri kuna Mwari. Uye Shoko rakaitwa nyama rikagara pakati pedu." "Shoko rakapinza kupfuura munondo unochecka nekwose, rinonzvera mifungo nezvinangwa zvemoyo." Hamusi kuona here kuti Shoko rakauya pakati pedu mumazuva ekupedzisira? NdiMweya Mutsvene ari kutora Shoko raMwari uye achiratidza Jesu Kristu, anova Chiratidzo. Ameni. Munotenda here? [Ungano inoti, "Ameni."—Mupepeti]

¹⁸⁷ Vangani vane makadhi ekunamatirwa? Regai vese vari kudivi *iri* vane makadhi ekunamatirwa, vasimuke mumutsara uyu neche *kuno* uku. Chingomirai, vese vari kudivi iro, divi iro chete mirai neche pano munzira yepakati pezvigaro. Kwete, munzira yekurudyi chete, ndapota, apo chaipo. Maasha, endai kunzvimbos yenu. Zvino kana vapedzerwa, itai kuti vamwe vasimuke, mushure mekunge vapedzerwa, zvino vopesaniswa nerimwe divi. Zvino munhu wese ngaave nekuremekedza.

¹⁸⁸ Mweya Mutsvene watora simba pamusoro pemusangano, saka pave nezvataurwa nezvaitwa zvakakwana kuratidza. Vangani vanotenda kuti Vari pano? Vangani vanotenda kuti ndicho Chiratidzo? Vangani vanotenda kuti iShoko? [Ungano inotanga kufara—Mupepeti] Tarisai, vangani vanoziva kuti Bhuku raVaHebheru rakataura, kuti, "Shoko raMwari rinonzvera mifungo *iri* mumoyo"? Vangani vanozviviza? Vangani vanoziva kuti ndicho chikonzero Jesu aikwanisa kunzvera mifungo yaive mumoyo yavo, nekuti Aive Shoko? Vangani vanozvitenda? Vangani vanotenda kuti ndizvo zvaive nevaporofita? Vakanga vari avo vaivingwa neShoko. Zvino kana Shoko rikadzoka kwatiri, haRingaiti zvimwe chete here? Zvino ko Shoko rinoratidza Shoko, ringagova sei rakatsveyama kuburikidza neShoko? Oo, nhai vedu! Remekedzai!

¹⁸⁹ Nhai, mudzimai uyu akagara pano, ane chimwe chinhu chiri pamoyo wake, zvakare. Ndangoerekana ndatendeuka

ndikachibata. Hamusi Mai Grant here? Handina kumbozviziva izvozvo. Asi ndimi Mai Grant, nekuti ndinokuonai muinacho. Mune kuhuta-huta kuri kukunetsai. Mune, mwakanomana wenyu ane chimwe chinhuwo...ropa rake, sekunge, riri kudonha. Ndinokupikisai kuti muzvitende! Ameni. Ndivo Tenzi wemamiriro ezvinhu. Ndivo Tenzi werufu.

Ngatinamatei.

¹⁹⁰ Ishe Jesu, apo Hupo HweNyu huri kutizodza, muno muchivakwa chino, uye tiri kuziva kuti uyu Mweya Mutsvene, ndinonamata, Ishe, kuti Mupodze munhu wese achapfeka mahengechepfu aya.

¹⁹¹ Imwe nguva, tinodzidziswa muBhaibheri, kuti vanhu veNyu, vari mugwara rebasa, vaiyambuka Gungwa Dzvuku, zvino gungwa rakapinda munzira yavo, munzira yavo kuenda kunyika yechipikirwa. Mwari vakatarisa zasi kuburikidza nemuShongwe yeMoto iyoyo, nemaziso ane hasha, zvino gungwa rakantha, rikadzokera kumashure, uye Israeri yakaenda mberi kunyika yechipikirwa, iri mugwara rebasa chairo.

¹⁹² Oo Ishe Mwari, regai maziso eNyu atarise kuburikidza nemuRopa raJesu Kristu, zasi muChiratidzo ichi pano chatacabata pamusoro pemahengechepfu aya nhasi. Uye dai munhu wese anopfeka aya, dai chirwere chatya, dai chadzokera shure uye charega vanhu veNyu vayambukira kuvimbiso yehutano hwakanaka. “Munamoto wekutenda uchapodza vanorwara.” MuZita raJesu Kristu, ngazvive saizvozvo. Ameni.

¹⁹³ Vangani vaparidzi veMethodisti vanotenda vari pano, vaparidzi veBaptisti, vaparidzi vePresbyteriani, Vaparidzi veBaptisti, Lutherani, kana maPentekosti? Vangani venyu vanotenda Ichi kuva Chokwadi? Huyai pano mumire pandiri tichinamatira vanorwara zvino. Huyai kumusoro kuno, imi mose vaparidzi vanotenda.

¹⁹⁴ Zvakanaka, hazvina here? Hama Grant, zvakanaka? [Hama Grant vanoti, “Chokwadi.”—Mupepeti Uh-huh.]

¹⁹⁵ Dzikai zasi kuno, hama. Hama Grant vane shumiro yekunamatira vanorwara. Murume wehumhare, murume akanaka, murume uyo Mwari vanonzwa uye vanovapindura munamoto, Hama Grant. NdinoFara kuisa ruoko rwangu rwakavambundira nhasi ndotaura kudaro, uye hama yangu. Zvino vachange vari pazasi apa vachinamata nenii.

¹⁹⁶ Paounuya nemumutsara uyu, sekunge wanga uri kuuya nepasi pemuchinjikwa. Hama, gadzirai mitsara miviri pano, ipo pano. Gadzira mitsara miviri; vamwe kumusoro kuno, vamwe zasi uko.

¹⁹⁷ Hama Roy Borders, muripi? Hama Roy Borders, ndafunga kuti vari pano. [Mumwe munhu anoti, “Vachadzoka.”—Mupepeti]

¹⁹⁸ Tarisai pano, pavashumiri, mungadaro here! Tarisa apo. Izvi zvinondiita kuti ndinzwe zvakanaka, hama. Vashumiri vemuchinjikwa, varume vakamira kumusoro kuno kuti vazvibatanidze neMharidzo. Chii chinogona kuitika?

¹⁹⁹ Zvino, tarisai, musazviise pavashumiri zvino. Vauya kuzozvibatanidza pachavo. Paunopfuura nepano, kurati-... bata Chiratidzo pamberi pako, “Ishe Jesu, ndareurura zvivi zvangu. Mukudzorera, Mandipa rubhabhatidzo rweMweya Mutsvene. Ndiri mudziyo wakatengwa. Chivi, hurwere kana hapana chimwe hacho chinogona kundibata kubva pano zvichienda mberi. Ndiri kufamba zvakanaka.” Bata izvozvo, oo, pamberi pako, uye wopfuura nepano, zvino Mwari vachakupodza uye uchabuda muno uchipembera, uchifara, uye ugopora. Munozvitenda here? [Ungano inoti, “Ameni.”—Mupepeti]

²⁰⁰ Zvino munhu wese ari muno, ngatikotamisei misoro yedu, hama, tiri pamwe chete. Hatizive zvichaitika. Hattitongozivi. Hapana chikonzero hacho chekuti chero munhu upi anorwara abude muchivakwa chino masikati ano. Bata Chiratidzo ichocco mumoyo mako, pfuura chaipo nemumutsara uno wekunamatirwa, uko vashumiri, vakazvitsaurira hupenyu hwavo ku-kushumiro, vachamira pano, vachiisa maoko pamusoro pako paunenge uchipfuura.

Unoti, “Ko mazviitireiko izvozvo, Hama Branham?”

²⁰¹ Ndinoda kuti imi, munhu wese, kuti azive izvozvo bedzi... Handisi mupodzi. Varume ava vane kodzero yekunamatira vanorwara semumwewo munhu wese. Kutura chokwadi, ndinotenda kuti Mwari vangatopindura minamato yavo Vasati vapindura yangu. Ini ndaneta nekurukutika, nezvose. Ndi—ndinotenda kuti Vanozopindura minamato yavo. Zvino hepanoi vamire pakati chaipo pawo, kuti vazvibatanidze, vasinganyari kutora nzvimbo yavo. Ndinoyemura varume vakadaro.

²⁰² Zvino, hama, ndinoziva manzwiro enyu. Ndiri, ndiri mumwe pamwe nemi. Ndini ndakarukirira mambure angu nemi, kunze kuno kuTexas, kuedza kubata imwe neimwe yehove idzo dzakatemerwa naMwari kuHupenyu, kunze uko. Ndiri kuita nepandinogona napo chaipo. Ndinemi, zvizere. Dzimwe nguva ndinotuka nekupopota pamusoro pesangano nezvinhu. Hazvireve kuti ndinopesana newe, hama yangu. Ndinoreva kuti ndinopesana nehurongwa hunotipatsanura kuva hama, nekuda kweimwe dzidziso yechinamoto. Tiri hama kuburikidza nerubhabhatidzo rweMweya Mutsvene. Takabata Chiratidzo chimwe chete. Takagamuchira Ropa rimwe chete, saka ngatizvitendei izvozvo. Tinogona kusangana Ipapo (hatigoni here?), hama, mumwe nemumwe wedu pasi peRopa.

²⁰³ Zvino, ndakagadzwa muBaptisti. Pamwe uri muMethodisti, kana muLutherani, kana muPresbyteriani, muPentekostti,

muOneness, muTwoness, muThreeness, kana chero chauinacho, Church of God, chero zvairi. Izvozvo hazvimboita kana mutsauko. Hatigone kubvumirana pazvinhu zvidiki izvi, ngatikanganwei nezvazvo zvino.

²⁰⁴ Chimwe chinhu chatinogona kubvumirana pachiri, kuti Jesu Kristu Muponesi wedu akafira zvivi zvedu, akamuka zvakare akatipa Chiratidzo. Takamira pano neminamato yedu, yekubata pamusoro pehama nehanzvadzi idzi dzinorwara dzinopfuura nemumutsara uyu. Ndiri kuzozvitenda nemoyo wangu wese.

²⁰⁵ Ndaona chimwe chinhu chichiitika izvozvi. Ameni. Ndinoziva kuti munofunga kuti ndinopenga, asi ndiri kunzwa kupenga kwakanaka. Ndinongotarira kuti ndinogona kugara nenzira iyi. Hongu, changamire. Ndinongonzwa zvakanaka nenzira iyi.

Ngatinamatei.

²⁰⁶ Ishe Jesu, ndiri kufamba ndichibva papuratifomu ino, zasi kuno, kunozvibatanidza nehamu idzi. Ndiri kuzvibatanidza pachangu navo, apo isu tese takabata Zviratidzo zvedu mumaoko edu, uye nemumoyo yedu. Tichiteerera murairo weNy, “wekuisa maoko pamusoro pevanorwara, uye vachapora.” Dai munhu wese anopfuura nepano, aratidza Chiratidzo chake, chekuti vakagamuchira Mweya Mutsvene, kuti ivo mwana waMwari vakaberekwa patsva, kuti vanozvitenda nemoyo wavo wese. Uye pavanopfuura, ngavatuke chirwere ichocco nekutambudzika kwemuviri wavo. Uye dai vabuda muno vachifara kwazvo, vachiziva kuti kutenda kwavo kwakavapodza.

²⁰⁷ Uye, Ishe Mwari, pataisa, Testamende Yekare, maoko edu pamusoro pechibairo, kuzvibatanidza nechibairo, tinoisa maoko edu pana Jesu uye tichizvibatanidza pamwe naYe. Akaisa maoko aKe patiri zvino mushumiro, achizvibatanidza pachaKe nesu, nezviratidzo nezvishamiso. Uye tiri kuisa maoko edu pamusoro pevanorwara, kuti tizvibatanidze navo, nekutenda kwedu kwakabatana navo. Hurwere hunofanira kuenda, uye ngahuzviite muZita raJesu Kristu, apo patinenge tichidzika zasi kuno kuzvigamuchira.

Ungano yese ngainamate.

²⁰⁸ Roy kana mumwe munhu ngaauye pano amire pedyo nemaikirofoni iyi, uye achengetedze mitsara yakatwasuka.

²⁰⁹ Tarisai, pamuri kupfuura nepano zvino, huyai muchitenda, huyai muchinamata. Tichangoturika maoko pamusoro pevanorwara. Huyai muchipfuura. Namatai. Paunopfuura nemumutsara wevashumiri ava, kana uchifamba nemadondoro, agadzike pasi wofamba uchienda. Kana wanga wine kenza, hurwere, iti, “Chiremba aita zvese zvaanogona, akaita zvese zvaaignona, uye akati ndinofanira kufa. Handisi kuzofa. Hechino Chiratidzo changu, Ishe. Makandivimbisa makumi manomwe.

Ndiri kupfuura nepano chaipo, ndichizviita.” Munoona, itai izvozvo. Muchazviita here? [Ungano inoti, “Ameni.”—Mupepeti] MuZita raJesu, ngazvive saizvozvo. Ameni.

²¹⁰ Zvakanaka, mutsara ngaufambe. [Hama Branham nevashumiri vanonamatira vanorwara, apo imwe hama ichitungamira ungano mukuimba *Tenda Chete* nedzimwe nziyo. Chibenga chisina chinhu patepi—Mupepeti]

Ndinotenda!
Kupokana kwangu kwese kwakavigwa
muTsime.

²¹¹ Munozvitenda here? [Ungano inoti, “Ameni.”—Mupepeti] Ameni. Oo, haAshamise here? [“Ameni.”] Vamwe vavo vanga vari panhowo idzo uye nemasitirecha, vasimuka ndokufamba vachienda; ndokungozvisiya zvakarara ipapo, ndokufamba vachienda. Oo, munhu wese anogona kupodzwa zvino, uyo anozvitenda. Munotenda here? [“Ameni.”]

²¹² Ngavatipewo kodhi, *NdinoMuda*, mungadaro here, hanzvadzi; rwiyo rwekekare, “*NdinoMuda*, *ndinoMuda* nekuti . . .”? Tese ngatingosimudzai mazwi edu, nemaoko edu, nemoyo yedu, kuna Mwari, toimba, “*ndinoMuda*, *NdinoMuda*, nekuti Akatanga kundida.” Munhu wese zvino.

NdinoMuda, *ndinoMuda*
Nekuti Akatanga kundida
Ndokutenga ruponeso rwangu
PaKariv- . . .

²¹³ Mumwe mudzimai, asimuka kubva muhwiricheya, achifamba apa akatsigirwa nevarume vaviri. “Ini . . .” Ngativheyesei maoko edu kuna Mwari, “*NdinoMuda*!”

NdinoMuda
Nekuti Akatanga kundida
Ndokutenga ruponeso rwangu
Pane weKarivhari . . .

NgatingoMurumbidzai zvino, munhu wese!

²¹⁴ Kubwinya kuna Mwari! TinoKutendai sei, Ishe Jesu, nekuda kwekunaka kweNyu, Hupo hweNyu. Oo, tinoKutendai nokuda kweChiratidzo, Ishe. Takaponeswa uye takazadzwa neMweya, Mweya Mutsvene uchifambisa mitumbi yedu zvino. TinoKutendai sei neizvi, Baba! Oo, muZita raJesu tinoKutendai. Ameni. Ameni.

²¹⁵ Munhu wese kwazisanai maoko, muti, “Ishe varumbidzwe!” Kwazisanai ruoko rwemumwe nemumwe, moti, “Ishe ngavarumbidzwe! Ishe ngavarumbidzwe!” (. . .? . . .) Zvakanaka, zvino, tose pamwe chete zvakare:

NdinoMuda,
Maoko akasimudzwa, moyo yakasimudzwa.

Ini . . .

Ingozviratidza zvichibva pamoyo wako.

Nekuti Akatanga kundida (Muri
kuzoparadzanisa vanhu here?)
Ndokutenga ruponeso rwangu
Pamuti weKarivhari.

²¹⁶ Zvino ngatikotamisei misoro yedu nekuremekedza chaiko, ndichidzosera shumiro zvino kuna Hama Grant kuti vaparadzanise vanhu; ndichitenda mumwe nemumwe wenyu. Kutanga, ndinotenda Ishe nekunaka kwaVo, tsitsi dzaVo, nekugutsikana kwandinovimba kuti tasiya mumoyo menuy, kuti hatisi pano toga. Kaputeni wedu Mukuru-mukuru ari pakati pedu. Kudanidzira kwaMambo kuri mumusasa. Uye isu tinotenda Ishe, kuona simba raVo guru netsitsi dzaVo huru. Uye zvino ngatikotamisei misoro yedu zvine ruremekedzo. Hama Grant.



CHIRATIDZO SHO64-0308
(The Token)

Mharidzo iyi neHama William Marrion Branham, yakaparidzwa kwokutanga neChirungu Svondo masikati, Kurume 8, 1964 paSoul's Harbor Temple muDallas, Texas, U.S.A., yakazotorwa kubva patepi yakarhekodwa ndokuzodhindhwa muChirungu pasina chakamurwa. Kuturikirwa uku muchiShona kwakazodhindhwa nokugoverwa neve Voice Of God Recordings.

SHONA

©2021 VGR, ALL RIGHTS RESERVED

VOICE OF GOD RECORDINGS, ZIMBABWE OFFICE
8 ST. ANNES ROAD, AVONDALE, HARARE, ZIMBABWE

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Chiziviso chekodzero

Kodzero dzose dzakachengetedzwa. Bhuku iri rinokwanisa kudhindhwapi papirinda yekumba kuti ushandise uri iwe pachako kana kugovera kunze, usingatengesi, semudziyo wekuparatzira Evhangeri yaJesu Kristu. Bhuku iri harigoni kutengeswa, kudhindhwapi akawanda, kuiswa pawebhusaiti, kana kuwana mumuchina waringachengeterwa, kuturikirwa mune mimwe mitauro, kana kushandiswa kukumbira mari pasina mvumo yakanyorwa nevekuVoice Of God Recordings®.

Kuwana umwe umboo kana zvimbewo zviripo zvingawanikwa, tapota nyorerai:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org